



दर्ता नं.: ४८/२०७६/७७

पुर्खा दय्क तकगु सम्पत्ति, भीगु कला व संस्कृति
पिकाक-भक्तपुर नगरपालिका



पुर्खा दय्क तकगु सम्पत्ति, भीगु कला व संस्कृति

स्वयं

नेपाल संवत् ११४१ गुँलागा / २०७८ भाद्र १५ / 2021 Aug / ल्या: ४२, दाँ: ३



अन्तर्राष्ट्रिय युवा दिवस
या लसताय जूगु ज्याइव:

नेपाल बैंक लि. या एक्सटेन्सन काउन्टरया उलेज्या यासे
प्रमुख ज्यू (२०७८ भाद्र १ गते)



नगर प्रमुख ज्यू याता ईसीडी शिक्षकपिसं ज्ञापन पत्र लःल्हात
(२०७८ साउन ३१ गते)





खुड्यागूगु स्वप पौ. बःछि पौ(पाक्षिक)

; Dkfb sLo

@)&* efb|!%, c^as ^*, jif{#

भक्तपुर काण्डया खाँ काडः न्हूगु पुस्ता शिक्षित याय

नेपाल मजदुर किसान पार्टीया नेता व कार्यकर्तापिसं गुल्लें हे लुमाङ्कय मफैगु दिन खः भाद्र ९ गते । २०४५ साल भाद्र ९ गते नेमकिपाता हाँगलिसें लिङः छ्वय्गु मतिं उल्लेया पञ्चायती व्यवस्थां राज्यस्तरं हे जः याडः क्वत्यल छोय्गु ज्या यागु खः । नेमकिपाया नेता नारायणमान बिजुक्छें (का.रोहित) नपां ६७ म्हा नेता कार्यकर्तापिन्ता ज्यान मुद्दा, मेपुं-फुकसिता शान्ति सुरक्षा व दलदल छ्वपया जनतातय्ता, नेमकिपाया जिल्ला-जिल्लाया कार्यकर्तापिन्ता निर्मम दमन याडः च्वंगु खः । न्हूगु पुस्ताता उगु काण्डया खाँ काडः ग्वाकय्ता नेपाल मजदुर किसान पार्टी दायें दायें पतिकं भाद्र ९ गतेता 'हाकुगु दिन' काथं लुमांकः उगु घटनाया विरोध अलय् कुंखिङः ज्या इवः त याड च्वंगु दः । थुगुसी नं थाय् थासय् ज्या इवः याड च्वंगु दः ।

पञ्चायती निरंकुश व्यवस्थाय् पार्टीत फुकक प्रतिबन्धित याडः तःगु जुल । पार्टीया छुं नं ज्या इवः न्ह्याकल किं पञ्चतय्सं अपराध यागु थें तायकिगु । अलय् खःगु मखुगु निहूँ ज्वडः राजनैतिक कार्यकर्तापिन्ता जेलय् तैगु । तस्कं अत्याचारया ई खः पञ्चायती व्यवस्था । नेमकिपां निरंकुश पञ्चायती व्यवस्थाय् द्रहं वाडः नं जनताया सेवा याय्गु नीति काला । निर्वाचनता जनतात गुली सः-स्यू व थूपुं जुलादक सियकेगु दापु काथं छ्यलः स्थानीय निसें राष्ट्रिय पञ्चायतया निर्वाचनय तक ब्वति कायो छ्यला । निर्वाचनया इलय् मेबलय् स्वयो अपः मनूत राजनैतिक खाँ न्यनय्ता प्याहाँ वैगु जुगुलिं पञ्चायती व्यवस्थां यागु अत्याचारया जातः प्वलय्गु ज्या, राष्ट्रिय पञ्चायतय् जनविरोधी कानुन पारित याकय् मबिय्गु व जनताता भिं जुडगु कानुन दय्के बियता दवाव बियगु थजगु जनपक्षीय ज्या याय्गु नीति काला । वहे नीति काथं स्थानीय नगर व जिल्ला पञ्चायतय् नं द्रहं वाड जनताया सेवा याय्गु नीति ज्वडः हज्याता ।

निर्वाचनता पञ्चायती व्यवस्थाया विरुद्धया संघर्ष काथं कायो हज्यागु व पञ्चतय्ता छुंनं थासय् अःपुक त्याकय् मबिय्गु नीति कः सेलिं पञ्चतय्सं नेमकिपाता न्ह्यागु कर्म याडः जूसां धू याय्गु मति तला । भाद्र ९ गते वहे पू वांकय् मफःगु जः ग्वगु दिन खः ।

नेमकिपाता यागु दमन सही सावित याय्ता सरकारी सञ्चार माध्यमत दुरुपयोग याडः नेमकिपाया नेता कार्यकर्तापिन्ता अपराधी थें याड प्रचार-प्रसार याता । न्ह्याक्वहे मखुगु खाँ ल्हाडः जनताया हनय् तपुयगु कुतः यासां छन्हू नं छन्हू सत्यखाँ पि मज्बइ मखु धाय्थें बुलुहूँ जनता तय्सं खाँ थुइकःहला । उगु घटनां मानव अधिकारवादीपुं, कानुन व्यवसायीपुं, बुद्धिजीवीपुं थी थी राजनैतिक दल नपां स्वापु दःपुं न्हयलुवापुं सकलें छथाय्सं मुनयें हल । 'भक्तपुर काण्ड' नेमकिपाता क्वत्यलः छ्वय्ता यागु जः खः धाय्गु खाँ क्वः छिता । अलय् फुकसिया मंकः कुतलं पञ्चायतया विरोधय् ल्वाय्ता तयार जुल ।

२०४६ सालय् जन-आन्दोलन जुला । नेमकिपां फुकक बः पिकायो पञ्चायतया विरुद्धय ल्वाता । आखिरय् चैत्र २६ गते पञ्चायती व्यवस्था कोदयो बहुदलीय व्यवस्था निस्वान । २०४७ बैशाख ५ गते का. रोहित नपां फुकक नेता कार्यकर्तात जेलं त्वतः हल । भूमिगत कार्यकर्तात खुल्ला जुल । गुलिं प्रवासं ल्याहाँ वल । थौं नेमकिपा वहे जःगय् दाडः हज्याड च्वंगु दः ।

अः नं नेमकिपां देया फुकक पुँजीवादी पार्टी तय्गु विरोध यायां वयो च्वंगु दः सा एमाले व माओवादी थजपिनिगु नक्कली कम्युनिस्टया खोल झ्यारभुर खुडः धात्थेंगु कम्युनिस्ट सिद्धान्त प्रचारयाडः वयो च्वंगु दः । व पार्टी याय्पिसं नेमकिपाता अः नं मूख्य दुश्मन ताय्कः नेमकिपाया विरुद्धय ज्या साडः च्वंगु दः । अथे जूगुलिं 'भक्तपुर काण्ड' हकनं-हकनं जुयफः । अथेजुगुलिं नेमकिपाया कार्यकर्तापुं अजनं खाँ थुइकः छप्पा छधि जुयो व्यवस्थित ढंगं हज्याड वानय् मः ।

पिकाक-ख्वप नगरपालिका/सम्पादक-आशाकुमार चिकंब्ज्जार, डेस्कटप-धन लक्ष्मी त्यात, आवरण सज्जा-रेणु ध्वजू, थाकू- भक्तपुर अफसेट प्रिन्टर्स फोन ल्याः ०१-६६९३०४३, ई-मेल- khwopapau@gmail.com



खुडच्यागुगु स्वप पौ. बःखि पौ(पाक्षिक)

चीन यात्रा

(का.रोहित) नारायणमान बिजुक्छें

पश्चिमी भील

हाडगचाउ नगरया पश्चिमय् लागु भील (ताल) या नां पश्चिमी भील काथं लोकं हवाः । धात्थें खय्कः थवः न्हा समुद्रया खाडी खः । अलय् लिपा चेताड खुसीं चुकइहःगु नाइगु चाः मुं मुं वांसेलिं उगु चां जायो खाडी छगू भील जू वान । अः भीलया नाः छँ इवाला (भरना) हे खः । थुकिया विशेषता धाय्गु हे थुकिया तस्कं बांलागु सुन्दरता हे खः ।

ताडगवंश (सन ६०७-९०७) निसें पश्चिमी भीलया लू (दृश्य) तस्कं लोकं हवागु खः । थुगु भीलता पुलांम्हा चिनियाँ अप्सरा (सुन्दरी) काथं वर्णन याडः तःगु दः । थुगु विषय चिनिया चिनाखँमि (कवि) सू-तुडग पो जुं थथे चवयो दिल ।

जगमग जगमग थिडः चवंगु
थुगु दहलय् सुजद्यो म्वः ल्हयवं
फुक्क लू (दृश्य) भन भन बांलात रे
खसुया गां डयो
तापाक्क चवंगु पहाडया
पुलपालु (भलंकं) किपालुं
अति हे बानं लात रे

मनूतय्सं धाई
न्हिलाखवः सिंहया बानलागु पहः
जुहारात तिडकसां मणि तिडकसां
छाय्प्यसां मप्यसां
उलि हे बांलाड च्वनि ।

थुगु तुड- पो या चिनाखँया
भावानुवादं थुलि खाँ सियदः कि पश्चिमी
भील छगू प्रकृतिया ज्वः मदय्कः बांलागु
भील खः । धात्थें हे थुली बांलागु पुखु

खाडः आना थयंपुं मनू तय्सं
मैं वांडाई ।

भीलया उत्तर
दक्षिण ३.३ किलोमिटर व्या
व पूर्व पश्चिम २-८ कि.मि.
हाक दः । थुकिया चाकलीं
१५ कि.मि. व (क्षेत्रफल)
५.५६ वर्ग किलो मिटर
भुडः चवंगु दः । थुकिया
जः २ मिटर गः वां धःगु

दः । भीलता सुताँ (पुल) व पाइताँ (पुलं)
नां या नेपु ताँ स्वाड ब्वथयो तःगु दः ।
तस्कं बांलागु ताँखें ब्वथयो तगु थुगु भीलया
नां थथे नां तयो तःगु दः । पिनय् चवंगु
भील, दुनयया भील व हाकुगु भील ।

कुसान (याकचागु पर्वत) पिनय्या
भीलया उत्तर पश्चिमय् पाइ नांया ताँखें
वानय्गु भीलया दकलय् तहांगु टापु दः, गुगु
कुसान अथे धाय्गु याकचा गु पर्वत या नामं
लोकं हवा । थुकीं १९ हेक्टर थाय् भुड तःगु
(क्षेत्रफल) दःसा ३-८ मिटर चवः जः ।
थुकिया दक्षिण पाखय् पिनय्या भील व
उत्तर पाखय् हाकुगु भील ला । थुकिया पूर्व
व पश्चिम पाखय् पाइ ताँखें स्वाड तःगु
दः । प्यख्यरं नाः नाः दक दःगु कुसान
(याकचागु पर्वत) टापु भीलया दकलय् बांलागु
पार्क जक मखु, सांस्कृतिक स्मारकया चें या
केन्द्र नं खः ।

टापुया दक्षिणी हिक्नुनय चेक्यांग
साफूकुथि, चेक्यांग म्युजियम व चुडसाड
पार्क (डा. सनयात सेन पार्क) व दक्षिणपूर्वी



हिक्नुनय चेक्यांग खेती या ब्वज्या शान्त
भीलय् 'शरद् चन्द्र' (शरदया मिला) धाय्गु
या गना शरद ऋतुया चान्हयें न्हयकं थें
यचुपिचुगु अलय् शान्तगु भीलय् तिमिला
थिडबलय् तस्कं स्वय हायें पुसे चवँ । टापुया
पश्चिमया हिक्नुनय हशीलीन शील समाज व
उत्तरय् सागर मण्डप व लिङ्-हो-चिङ्ग
चिहान दः । शील समाज १९०३ सनय् चिङ्ग
वंशया जुजु क्वाङ्ग हसुया पालय् हाडचाउया
नेम्हाप्यम्हा कलाकारपिसं शील त्वाल्हाय्गु
बांलागु कला अध्ययनया लागिं छपा छधि
यागु जुयो च्वना ।

लिङ्ग-हो-चिङ्ग छुं इलय् लिङ्ग
(१६७-१०२८) नामं नं लोकं हवा, सुड
वंशया छम्हा कवि सामन्त शासनं चित्त
बुभय् मज्जयो थुगु याकचागु पर्वतय् चवड
जीवन फुकय्गु मतिं वगु खः । चखुं बखुंया
पापु व स्वां खं जायो चवंगु थुगु थासय्
लिङ्ग पूया चिहान दः ।

पिनय्या भीलय् हसियाङ्ग इङ्ग
चाउ (तिमिलाया किचा थजगु स्वंगू कुण्ड)



खुड्यागूगु स्वप पौ. ब.छि पौ(पाक्षिक)

हुसिन टिङ्ग (दथुयाय् भील कुण्ड) थजगु तापुनं दः ।

चन्द्रमाया किचा थजगु स्वंगु कुण्ड भीलय् दकलय् तःजगु थासय् डाहवः, डाहवःदःगु स्वंगु ल्वहँ याय् गःजु थजगु थां तः दः । अगष्टया बायं इलय् जुइगु पर्वखय् गःजुया थांचाखय् दुनय् मैनमता च्याकः डागुं तुं प्वाल्य भूँतिङ बिइबलय् आनानं पिज्वइगु वहे गःजु -थां या जःतिं नाखय् क्वय् तिमिलाथे त्वयो च्वनिगु । उगु थासय् डय्डापा चन्द्रमा त्वगु थें खानय् दैगु । उगु लू (दृश्य) स्वयबलय् तस्कं हे बांलागु व मन हे आनन्द जुइगु ।

दथुया भील, कुण्ड भील या दथ्वी सं लाः । गुगु मिङ वंश (सन १५५२) नं दयकगु खः । क्रान्तिया इलय् व फुक्क हे धू धू जूथें जुल । मुक्ति लिपा न्हँगु मण्डला (मण्डप) दय्कः ताजि-ताजिया (फलफूल) सिसाफलमाँ त पिङ तःगु जुल ।


दुनय्या भीलय् 'डासिंगया लुँथें म्हवसुगु (सुनौलो) पुखु' व सुनौला बालु-ताङ डासिंग सुनौलो पुखु मुक्ति हाँ ३ माऊ (०.५ एकड) जक दता । मुक्तिलिपा थुकिता २१० माऊ, (३५ एकड) तक तः ब्याकः यंकला । अः आना पुखुली हिद्व स्वयो अपः डात चुलबुल याडः म्हेत च्वंगु दः । थुगु पुखु सू-पांगु तायं यांग पो व सुलान नां या नेपु ताँ या दथ्वी ला ।

वर्षा या इलय हाकुगु भील' य् पलेस्वं लायो तःगु थें च्वनिगु बहनि सिया सिचुगु फसं पलेस्व्या नास्वागु बास जक ज्वड उखय् थुखय् डाडः वइबलय् थाना चाहय् वैपुं मनूत आनन्दं मन चं चं धाय्कः च्वनिगु । थुगु भीलया नां 'हाकुगु भील मजूसें पलेस्वां या बार(भील) धः सा तस्कं बांलाइ थें च्वं । थुकिया चाकलीं वाउँसे च्वंकः स्वं-सिमात पिङः तःगु दः । गुकी बांलागु पह अपलं ताङः ब्यूगु थें खानय् दः ।

पश्चिमी भील हाङ्चाउ नगर पाखय् बाहेकं प्यखेरं पहाडं मुडकः तःगु दः । उगु पर्वत मध्ये ३०२ मि. तःजःगु दक्षिणया तःजःगु

च्वका (चुचुरो) उत्तरया च्वका नामं जः ।

पश्चिमी भील प्राकृतिक बाँना (सुन्दरता) तस्कं बाँला । अलय् थुकी मन् तयसं थप समा याक बलय् बांलागु ख्वालय् सिन्हं, आंजं भन बांलाक ब्यू थें भन हे बांलाक मन हे याउँसे च्वनिगु थाय् काथं दय्क ब्यूगु दः । लुँ खय् बुट्टाकियो बांलाक ब्यूथें चिनिया जनतां व दय्कपुं कलाकारपिन्ता तस्कं च्वछायो च्वंगु दः । गुम्हासिं न्हापा थुगु प्राकृतिक भीलता थःगु



बुद्धि व बलं बुट्टाकियो थापाच्च बांलाक व मन हव्इगु काथं आनन्ददायकगु थाय् दय्कला । चिनियाँ तय्गु पुलांगु उखान काथं

“च्वय गनां स्वर्ग दःसा

क्वय् स्वर्ग थजगु सुचाऊ व हाङ्चाउ ।”

न्यडा, सुचाउ नं हाङ्गचाउ थें बांलागु व हायपुगु थाय् खः । अलय् जिगु लागिं दकलय् बांलागु थाय् खः । सुचाउ थः वाडागु मखुनी च्वयया स्वर्ग धाय्गु जिता विश्वास मरु ।

जिपुं पश्चिमि भीलया कुं कुलामय चाहिल फःय् वैगु तस्कं सिचूगु फसं हैगु लहर वनकुञ्जया वाउँगु व तस्कं बांलागु ताँत, अलय् लुँ थें म्हवसुपुं डातय्गु चुलबुल स्वस्वं जिपुं लुदांकः मन हवय्कः स्वया । अलय् गुँया कार्पेट थजगु तस्कं नाइगु घाँय लायो तःगु प्रकृतिया मूलय् पलखः गारा-गारा तुला । मचात बलय् इनरय् (सूर्यविनायक) गुईं म्हेतागु कासा लुमांकः च्वडा । गजगु आनन्द ? लुमाङ मवानिगु न्ह्याब्लें मनय् लुयो वैगु उगु ई, स्व स्वं स्वय मगागु वाउँसे च्वंगु तस्कं मन सालः काइगु हाङ्गचाउ ! अहो ! वर्णन हे याय् थाकुगु ।

बहनी जिपुं च्याताइलय् पेकिङ्ग अपेरा स्वः वाडा । स्वकुमिपुं पेकिङ्गय् थें तस्कं अनुशासित खानय् दः । अजगु अपेरा जिमिसं पेकिङ्गय नं स्वय् धुंगु जुल । अपेरा (गीती नृत्य) म्यें हाल ल्हइगु प्याखं खः । श्व चीनया शास्त्रीय नृत्य धः सां ज्यू । सायद पेकिङ्ग अपेरा थजगु भीकय् छुं प्याखं दः थें जिं मताय्का । भैल प्याखं, देवी प्याखं, नवर्दुगा प्याखं स्वयो श्व अपलं हे पा । भैल प्याखं व देवी प्याखनय् थें ख्यावारा, कवंचा थजपुं प्याखं म्वः तय्सं क्यनिगु शारिरीक कला प्रदर्शन पेकिङ्ग अपेरा खय् नं दः । थथे खयानं पेकिङ्ग अपेरा प्राचीन चिनियाँ न्यँ कँ बाखंया लिधंसाय् क्यनिगु खः सा भीगु भैल प्याखं व देवी प्याखं धार्मिक बाखंया लिधंसाय्, धर्मया भावनां प्याकः क्यनिगु दः । पेकिङ्ग अपेरा नं धर्म व स्वर्ग तापाक्क च्वंगु मरु अलय् अथय् हे भीथाय् नं भीगु अजगु हे बाखं दः । भैल प्याखं व देवी प्याखं भाव नृत्य (खिंया तालय् प्याखं ख्वायँ व लाहाभाय याडः ल्हइगु प्याखं) खः सा पेकिङ्ग अपेरा बाखं म्यें या लिधंसाय् ल्हइगु प्याखं । अपेरा लिपा जिपुं कन्हय् तकया लागिं आराम याडा ।



खुड्यागुगु स्वप पौ. बःछि पौ(पाक्षिक)

भक्तपुर काण्डः राज्यस्तरं ग्वगु पू मवांगु जः (षडयन्त्र)

- प्रमुख सुनिल प्रजापति

राजनीति तप्यंगु लायँ जक डाइ मखु । राजनीतिख्य गुब्ले मतिमरुगु घटनात नं जुई । जः, मखुमखुगु खाँ ल्हाड मारी क्यडः क्वः लायंगु ज्यात, अकातं सिमा गय्केगु पुँजीवादी राजनीतिख्य तहांगु खाँ मखु । छायाधःसा शासन न्ह्याब्ले ल्यंकः तयता पुँजीपतिवर्ग न्ह्याथिन्योगु भिंगु-मभिंगु ज्या याय्ता नं लिफः स्वइमखु ।

चाणक्यं छथाय् दायो तःगु दः- 'शत्रुता न्ह्यागु कर्म याडः जूसां धूयाय्गु ज्या न्ह्यागु काथंसां नीतिसम्मत धाय्मः ।' वं क्वह्यंगु नीति काथं शत्रुपक्षता न्ह्यो छ्वय्ता जः याडः खयकं -मखयकं षडयन्त्र याडः, मिखालय् धूलं छ्वाक जूसां सत्ता म्वाकः तय्गु कू नीतियाता शास्त्रसम्मत जक धःगु खः ।

राज्य सत्ता सुननं अः पुक त्वतिमखु अलय् अजगु ज्या ल्यडः च्वनि नं मखु । सत्ता ल्यंकः तय्ता शासकतय्सं ख्वः पा पुयो थी थी ज्या इवः त याई । अकिता तपुयता अमिसं अनेक कुतः याई । अथेहे २०४५ सालया भाद्र ९ गते राज्यस्तरं ग्वः गु 'भक्तपुर काण्ड' नं छगु तहांगु जः नपां अमिगु कुकृत्य तपुयता यागु छगु तहांगु षडयन्त्र खः । उगु जः याता तपुयो छ्वय्ता सरकारी सञ्चार माध्यमत रेडियो नेपाल, नेपाल टेलिभिजन, गोरखापत्र थजगु सञ्चार माध्यमता दुरुपयोग याडः जनताया मनय् भ्रम थाडः बिला । नेमकिपा व 'रोहित समूह' ता छगु अपराधी पुचः थें याडः बय-बय याता, नेमकिपाता स्वयहे मः मदैगु काथंया फुक्क हे घच्यापुगु ज्या याता । नेमकिपाता क्वत्यलः छोय्ता क्वयनिसें च्वय थ्यंकया फुक्क बः छ्यल । छुं हे मस्यपुं सर्वसाधारण जनताया मिखालय पलखः धूलं छ्वाकय् फःसां लिपा वयो पञ्चत थः म्हुया गालय् दुना । अमिगु कुतः पू मवां ।

राजनीतिसं थःगु सत्ता ताःतक म्वाकः तय्ता नेपू लां वानिगु खानय् दः ।

१. कानून व विधित छ्यलः

२. शक्ति वा बः छ्यलः

कानून छ्यलः शत्रुता क्व त्यलय्गु तप्यंगु व अःपुगु लाँ जुल । दायो, लुटेयाडः, स्याडः, डाँका दालय् याडः, मुद्दा खय् राजनैतिक दलया नेता तय्ता क्यंकः चरित्र हत्या याडः बिई । अलय् राजनीतिख्य थाहाँ हे वय मफय्कः क्वफ्वाडः बिई । वा कपः क्वछुकः तुतिपाली भव पुडकय्गु कुतः याई । 'बाली लय्गु आन्दोलन' भर्पाई आन्दोलन' म्हेवँ हकया आन्दोलनया न्हयलुवापुं भी अग्रजपुं ज्ञान बहादुर न्याईच्याई, गोविन्द्र दुवाल नपांया अपलं मनू तय्ता मुद्दा लगय्यागु भीसं सिया । जनताया तस्कंयोपुं नेतातय्ता शासक दलं न्ह्याथिन्योगु महाजालय क्यंकय्तासां गुब्ले हे त्याई मखु । न्ह्याब्ले बु हे बुई ।

'भक्तपुर काण्ड' खय् शासकपिसं कानून वा विधिया प्रयोग नपां अपलं बः नं छ्यला । थुगु नेगू शक्ति छ्यलः थुकिया लिधांसाय



नेपाल मजदुर किसान पार्टीया नेता कार्यकर्तापिन्ता हाँगनिसें हे ल्यं थानिगु कुतः यागु खः । छम्हा मनूया ज्यान वांगु क्यडः नेमकिपाया नायो भाजु निसें ल्यतु ल्ययो ६७ म्हासिता ज्यान मुद्दा चलय् याडः सलं स मनूतय्ता शान्तिसुरक्षा दक जेलय् तःगु, द्वलंद परिवारता अनेक छ्याचव बियो दुःख ब्यगु अलय् अमिसं 'धायगु हे खः' धायकेता द्वलंद प्रहरी त छ्यलः लां-लां तक सकल ख्वपया जनताता क्वत्यलः च्वंगु, ज्वडः यंकपिन्ता पशुताथें अपलं कसा याडः यातना ब्यगु थूकिया प्रमाण खः ।

अलय् पञ्चतय्सं नेमकिपाखाड छाय् आपासिकं तं पिकाला ? थव मथुइकसिं मगागु खाँ खः । अलय् थौं या न्हूंगु पुस्तां भन मथुइकसिं मगागु खाँ खः । पञ्चायती ब्यवस्था निर्दलीय धसां छगु दलीय ब्यवस्था खः । पञ्च तय्गु विषयता ज्यू, हस, खः धाय्गु बाहेकं मेगु छुं नं काथंया पाकः बिचः तय् मरु । फुक्क पार्टीत प्रतिबन्धित याडः तःगु जुल । पार्टीगत काथं छुं नं खाँ पिब्वःसा व अपराध काथं कायो सजाय याइगु । अलय् अमिता झ्यालखानाय् कुडः अनेक सास्ती याइगु । अजगु तस्कं थाकुगु व ग्यापुगु इलय नं नेपाल मजदुर किसान पार्टीया न्हयलुवापिसं 'बाली लय्गु आन्दोलन, भर्पाई आन्दोलन, मोहियानी हकसुरक्षाया आन्दोलन, भारतं सुस्ता त्यल कःगुया विरोधय आन्दोलन, १९५० या असमानसन्धी नपां भारतीय विस्तारवाद व अमेरिकी साम्राज्यवादया विरोधय जनतातय्ता खाँ काँ काँ ग्वाकः छपा छधि याडः हला ।

नेपाल मजदुर किसान पार्टीप्रतिक्रियावादी संघ, संस्थाय् द्वहँवाडः जनताया सेवायाय्गु लेनिनवादी नीति काथं पञ्चायतया छगु छगु निर्वाचनता छ्यलः वगु खः । उब्जेया माले, चौथो महाधिवेशन



खुड्यागूगु स्वप पौ. ब.छि पौ(पाक्षिक)

नपांया पार्टी तयसं उब्ले चुनाव बहिष्कार यागु इलय् नपां नेमकिपां निर्वाचनय् ब्वतिकायो पञ्च तयता अःपुक त्याकय् मब्बु । निर्वाचनय् पञ्चायतया जात प्वलय्गु बहुदलीय ब्यवस्था छाय् मः धाय्गु विषय जनताता राजनैतिक शिक्षा बियगु दबु काथं छ्यःगु जुल । नेमकिपाया उम्मेदवारपुं गना गना दाना आना आना पञ्चातय् सातो हे वानिगु । चुनावय् बुसां जनताया दशवी बहुदलवादी बिचः या छाप मनय् तकयता पार्टी सफल जुजुं वल । थव पलां पञ्चतयता अःपु मजुल । अथे जूगुली पञ्च तयसं नेमकिपाता न्याथय् याडः जूसां क्वत्यलय्गु मतिं ज्या यागु खः ।

नेपाल मजदुर किसान पार्टीया थी थी जिल्लाय संगठन दः सां कर्णाली व वागमती उम्मेदवारत त्याकगु खः सा ख्वप नगरपालिकाय् नेमकिपाया बांलागु (पूर्ण) बहुमत दः । जिल्ला पञ्चायतय् नं नेमकिपा व नेकां समर्थितपुं स्वयो पञ्चत म्हुँ जक दता । नेमकिपां ज्वंगु लाँ पु मेगु पार्टी नं ज्वनकिं पञ्चत तस्कं कमजोर जुइगु बस्तुस्थितिं क्यडः च्वंगु जुल । राष्ट्रिय पञ्चायतय् त्याकः वां पुं प्रतिनिधिपिसं देश व जनताता भिं जुइगु कानुन दय्केता अलय् जनविरोधी कानुनत ह्यके मबियगुलि कुतः यात । नेमकिपाया छम्हाजक प्रतिनिधि नं पञ्चतयगु लागिं ल्वहँचा न्हियगु थें जुल । राष्ट्रिय पञ्चायतत बहुदलया प्रचार यागु दबु काथं पार्टी छ्य छ्यं वयो चवना ।

स्थानीय निकाय निर्वाचनय् नेमकिपाया प्रतिनिधिपिसं भक्तपुर नगरपञ्चायतय् बहुमत कः सेलिं शिक्षा क्षेत्र थाकायगुलि बः बिल । सरकारं डागु तगितक निःशुल्क यागुली नगरपञ्चायतं न्ह्यगु तगितक निःशुल्कया ब्यवस्था, 'पञ्चायत' लय पौ पिथाडः मार्क्स, एंगेल्स, लेनिन, स्तालिन व माओ विचारधारा पिकायो प्रचार-प्रसार याता । फुक्क ल्याचा न्हयकनय् स्वयथें पारदर्शी याता गुकिं देया थी थी जिल्लाया जनताया दशवी बांलागु लिचवः लाता । थः हे जक धायो एकछत्र शासन याडः च्वंपुं थःगु म्हुतिई हे कानुन घाड जनताता क्वत्यलः च्वंपुं भ्रष्ट पञ्चतयगु विरोधय् जनताता थानयगु ग्वाकयगु ज्या नेमकिपां याडः वयो च्वंगु खः । नेमकिपाता न्यागु हे त्वहचिडः जूसां हाँगः निसें हे लिड छवय्गु मतिं निहुँमाल च्वंगु जुल ।

२०४५ साल भाद्र ५ गते भवखा ब्वगु अमिता छगू बांलागु मौका जुल । कानुनय् मिलय् मजु काथं भू.पू.रापसता राहत इकय् बिल । वं आना जाना जान हे पक्षपातकाथं छँ मद्रूप थःपुं मनूतयता जकः राहत इड बिल । नेमकिपां त्याकः वांम्हासिं पार्टीतां मिखालय् धुलं छ्वाकः, धोखा बियो वांगुलिं जनतात व वनपां तम्बयकः च्वंगु जुल । अलय् पञ्चतयसं नं वाता विश्वास यागु मखु । वहे विश्वास त्याकयता वं ख्वपया जनताता तम्बयकः पञ्चतयगु विश्वास काय्गु मतिं ज्या सांगु जुल । छुं हे मस्यूपुं सर्वसाधारण जनतां शासक तय्गु कुमतिया षड्यन्त्र थुइगु खाँ हे मखुत । अमिसं हःनय वगु जक खाना । सामान्य घाइटेजक जूम्हा मनू उखुनुं हे सीत जक घोषणा याडः नेमकिपाया नेता कार्यकर्ता पिन्ता ज्यान मुद्दा चलय् याता । लां लांतक ख्वप दे युद्ध भूमि हे जुल । दुःखया बयान याडां हे साध्य

मजु । अपलं मनू तय्गु जागीर वान । अपलं मनू तय्गु ब्यापार ब्यवसाय मत, गुलिसिया परिवार मदय्कः च्वनय् माल । उगु दुःख कष्टखय् पाजुड जूपुं सुं दः सा नेमकिपाया कार्यकर्तात गुम्हासिता पञ्चतयसं ज्वनयमफूपिसं हे खः । अमिसं बुलुहुँ पञ्चतयगु पुयो तःगु ख्वपाः मुलः धात्यों गु ख्वपा कयँ कयँ यंकला । अमिसं यागु जः जनाताता काँ कां यंकला । आखः नपां ब्वनय् मसःपुं मिसामचात नं छप्पा छधि जुयो पञ्चायती राज्य सत्तां याडः च्वंगु जः या विरुद्धय ल्वः वला 'गना दमन जुई आना प्रतिरोध जुई' धः थें चर्को प्रतिरोध देशां देछिया जनताकय् छगू न्हूगु बः प्याहाँ वला ।

जेलय् दुनयँ-पिनयँ व प्याहाँ मवसैं भूमिगत जुयो ज्या साडः च्वंपुं प्रवासय् च्वंपुं सकल नेता कार्यकर्तापिनिगु छगू जक उद्देश्य पञ्चायती ब्यवस्था हाँगलिसैं ल्यं थानय्गु खः । वहे उद्देश्य पू वांकयता मानव अधिकारवादी संस्था, कानुन ब्यवसायीपुं, बुद्धिजीवीपुं व थी थी राजनीतिक दलया नेतात छथाय् सं मुकय्गु कुतःयात । २०४६ सालया आन्दोलनय् नेमकिपा बाममोर्चा च्वडः मकः आन्दोलन याता । आन्दोलनय् दकलय् न्हूपां गोली ख्वपय् हे कयकला अथेनं आन्दोलन मदिकसैं न्याकातुं यंकला । २०४६ चैत्र २६ गते बहुदलीय ब्यवस्था हकनं निस्वान । नेमकिपाया कार्यकर्तात २०४७ बैशाख ५ गते जेलं त्वः तल । उखुनुं तिनी नेमकिपाया कार्यकर्ता पिन्ता बहुदलीय ब्यवस्था वला ।

'रोहितलाई फाँसी दे' (रोहित ता फाँसी ब्यू) दक नारा थवयकपुं मरिचमानपिन्ता २०५६ सालया आन्दोलनय् 'मरिचेता फाँसी ब्यू' दक जनतां नारा थवयकला । 'सु अपः मिखय् म्हेती व मिखय् हे सी, सुअपः नाः खय् म्हेती व नाखय् हे सी' धः थें जःजि याडः शासन सत्ता ल्यंकः तय्गु मति यापुं पञ्चत थः हे म्हुया गालय् दुडः सीता ।

नेमकिपां अः नं निर्वाचनय् भाग कः नि । पुँजीवादी ब्यवस्था दुनय द्रुहँ वाडः जनताया सेवा याय्गु नीति काथं क्रान्तिकारी संसदवादकाथं ज्या साडःच्वंगु दः । संसदय् जनताता मभिकिगु कानुन पास याकय् मबियता, जनताया पक्षय् न्हँ न्हूगु कानुन दय्के बियता संघ व प्रदेश संसदता छ्यलः च्वंगु दः सा स्थानीय जनतानपां तप्यंकः स्वापु दैगु स्थानीय तहलय् ब्वति कायो द्रुहँ वाडः जनताया सेवा याडः च्वंगु दः । मचात स्वयगु शिशुशाला निसैं कलेज त न्ह्याकः च्वंगु छगू हे जक स्थानीय तह ख्वप खः । विश्व विद्यालय चाय्केता नं स्थानीय तहं तयारी याडः च्वंगु दः । स्वास्थ्य लागाय् अस्पताल न्ह्याकः च्वंगु दः । शिक्षा, स्वास्थ्य, सम्पदा ल्हवनय्कानय् ज्या व मेमेगु जनताता भिं जुइगु ज्याखय् हृदाय च्वडः ज्या साडः च्वंगु दः । जनताया भिं ज्याखय् ज्या सानय् वं हे फूक्क सिनं बांला ताय्की मखु । भूगु बांलागु ज्या खाडः शत्रुत इतिमिति काडः इमाभरं कायो जूगु दः । अजपुं सर्पतयसं मौका स्वयो हकनं कपः ल्हाडः हयो नेमकिपाता खत्तम याय्ता बुबलय् निसैंया बः पिकायो दाडः वय फः । २०४५ सालया 'भक्तपुर काण्ड' हकनं -हकनं याय् फः । का. रोहित जू धायो द्यू थें -'चाणक्य अभ्रनं मसी नि ।'



खुड्यागुगु खप पौ. बःखि पौ(पाक्षिक)

‘भक्तपुर काण्ड’ या विरोधय् खप नगरपालिकाया उप-प्रमुख रजनी जोशी जुया न्वचु


‘खप दे’ देया दकल्य चिच्याक्वगु नगरकाथं म्हासिङ्का पिब्वयो वयो च्वंगु नगर खः । थुगु नगरं ६.८८ वर्ग कि.मि थाय् कय् च्याङः च्वंगु दः । थुगु चिच्याहांगु नगरया म्हासिङ्का देश विदेशय् डाङः पुङः च्वंगु भी सकल सिनं सियागु खाँ हे जुल । विश्व सम्पदाया थाय् दःगु नपां खप दे या फुक्क थासय्या भौतिक अलय् सांस्कृतिक सम्पदां याङः थुगु नगर लोकं हवागु खः । भीगु नगर खपया प्रसिद्धि थौं तक नं ल्यङ्ग च्वंगु दः ।

विशेष याङः सांस्कृतिक नगर खपता ज्ञान-विज्ञान व प्रविधिया नगर दय्केगु लक्ष्य ज्वङः खप नगरपालिका हज्याङः च्वंगु दः । छायाधःसा भीसं भीगु नगरया इतिहास थुगु थासय्या इतिहास, भौतिक व सांस्कृतिक सम्पदा ल्यंकः म्वाकः तयो भीगु सभ्यता म्वाकः तय्गु भीगु कर्तव्य भः पियो ज्या साङः च्वङागु खः सा थौं या आधुनिक इलय् विज्ञान सम्मत काथं नगरता छायापियगु नं फ्वंगु खाँ नं भीसं थुया । वहे काथं शिक्षा, स्वास्थ्य नगरया फुक्क जनता काय् फय्मः धाय्गु नगरपालिकाया मू उद्देश्य खः । जनताया थजगु नपां श्व थन्योगु आधारभूत आवश्यकता पू वांकय्ता जिपुं जनप्रतिनिधिपुं व कर्मचारीपुं लाहापास्वाङः हज्याङ्ग च्वङागु दः । अलय् आजु पू वांकय्ता ज्या साङः च्वङागु दः थयेयाङ हे हज्याय फःसा भी अग्रजपिनिगु म्हागस पू वानी । अजगु ज्या यायां वानर्थ ।

जिं थ्व खाँ तय्गु कुतः थुकिं याङः च्वङागु खः कि भी थौं थानातक थयंगुया मू हुनि नेपाल मजदुर किसान पार्टीया हानय्

बहम्हा नायो भाजु नपां पार्टीया न्ह्यलुवापिसं याङः द्यगु त्याग व बलिदानया कारणं हे खः । वयकपिसं मदिक जनताया सेवाखय् छिङ्ग च्वंगु पला, चिन्तन, कुतः या लिच्वः हे थौं या खप दे खः । थुकिता अज हे सुचुपिचु याङः भीगु सांस्कृतिक नगर खप देता ज्ञान-विज्ञान व प्रविधिया केन्द्र दय्केगु जिम्मा अः न्ह्यगु पुस्ताया लाहातय् वगु दः । भीसं भीगु जिम्मेवारी कुबियो ज्या सानय् बलय् छकः इतिहास पुङ्कः स्वयमः इतिहासं सय्क थुङ्क हज्याय्फःसा भीगु म्हागस पू वानी ।

नेमकिपाता २०४५ भाद्र ८ गते राज्यस्तरं ग्वसः ग्वयो यागु ‘भक्तपुर काण्ड’ तस्कं दुःख बिला । स्वीस्वदा हाँ नेमकिपाता हाँगलिसे ल्यं थानय्गु कुमतिं ज्या सापुं पञ्चत व राजतन्त्र थः हे ल्यं दाङः वाना । नेमकिपां देशय् न्यायपूर्ण समाज निस्वानय्ता वैचारिक, सैद्धान्तिक व राजनीतिक संघर्षता ज्वङः हज्याङः च्वंगु पार्टी खः । थथे सिद्धान्त व बिचः त्वः मतः सिं हज्याङ्ग च्वंगु पार्टी खाङः ग्याङः हाँगनिसें लिङः छ्वय्गु कुमतिं ज्या सापुं थः हे धूलय् मालय् मःगु इतिहासं प्रमाणित यात । नेमकिपाया बिचः व सिद्धान्तया कारणं उब्लेया शासक तय्गु मिखालय् वांगु धू थें जूला । जनताता राजनैतिक ज्ञानं ग्वाकः ज्यासाङः नैपुं ज्यापु ज्यामिपिन्ता छप्पा छधि याङः अमिगु विरोधय् थाङः हःगुलिं नेमकिपाता खतम याय्गु मतिं जः ग्वता । २०४५ भाद्र ५ गते ब्वःगु भ्वखाचां दुःख जूपिन्ता ग्वाहाली याय्गु मतिं राहत इङ्ग बिच मःगुलि छँ मद्रूपिन्ता राहत विङ्कय् बियो जनताता तं म्वयकगु खः । गुकिं ‘भक्तपुर काण्ड’



जुल । उगुदिं नेमकिपाता हाकुगु दिन जुयो बिल । उकीं नेमकिपाया नेता कार्यकर्तापुं अपलं सिनं जेल-नेल भोगय् याय् माल । अलय् अजगु जेल नेल व दुःख कष्ट सियमःसां अत्याचारया विरुद्ध देशां देछिया जनतात छप्पा छधि जुयो ल्वासेलिं २०४६ साल चैत्र २६ गते देशय् प्रजातन्त्र वल । थुकिया मू हुनि मध्ये छगू ‘भक्तपुर काण्ड’ नं खः । प्रजातन्त्र वयानिं नेमकिपा भन सक्रिय जुयो हज्यात । अः तक नं जनताया अधिकार या लागिं राजनैतिक संघर्ष याङः जनताता राजनैतिक ज्ञान व सैद्धान्तिक ज्ञान ब्यू ब्यू छप्पा छधि याङ्ग स्थानीय निकाय व संसदय् वाङः जनताया पक्ष ज्या साङः च्वंगुलिं जनता तय्के, नगरवासीपिन्के सकारात्मक सोच वगु खः ।

अथेजगुलिं थजगु काण्डत हकनं -हकनं याय्फः धाय्गु खाँ थुङ्कः भी सकल नेमकिपाया जनप्रतिनिधिपुं, कार्यकर्तापुं नपां थुगु नगरपालिकाया कर्मचारीपुं खाँ थुङ्क सचेत जुयो जनताया सेवा खय् लिमच्यूसें नेमकिपाया सिद्धान्त व बिचः काथं हज्याय् फःसा पार्टीता सम्मान याडागु थें जुई । सुभाय् ।

(२०७८/५/११ या जूममिटिङ्गसं बियो द्यगु न्वचुया भाय हिला)



समाजय् ह्यूपा हय्ता ल्यासे-ल्याम्होपिसं यायमःगु ज्या

विवेक

‘अन्तरराष्ट्रिय युवा दिवस’ या लसताय थाय्-थासय् ल्यासे-ल्याम्होपिसं यायमःगु ज्याया बारे अपलं खाँ जुयो च्वंगु दः । धात्थें ल्यासे-ल्याम्हो धाय्गु वसै खः लाकि बिचः धाय्गु बारे नं छलफल याय् मःगु ईलं धायो च्वंगु जुल । क्वह्यंगु व ध्वगिगु बिचः ज्वडः हज्याडः च्वंपुं ल्यासे ल्याम्होपुं वसै ल्यासे-ल्याम्हो जूसां अमिता धात्थें पुं ल्यासे ल्याम्हो धाय् मत्व । समाजता हछ्याइपुं, प्रगतिशील व क्रान्तिकारी बिचः ज्वडः जीवनया ई पाडः वयो च्वंपुं न्ह्यागुहे वसै याय् पुं थजुयमः अपुं ल्यासे-ल्याम्हो खः । थव हे धात्थेंगु ल्यासे-ल्याम्होया म्हासिइका खः ।

वसैया दापु ज्वडः थी थी देशं थः थः गु पहलं ल्यासे ल्याम्होया म्हासिइका पिब्वयो वयो च्वंगु दः । बङ्गलादेशं हिं डादा निसें स्वीदातकया, भारतं हिंखुदा निसें नीगुदा तक, अलय् चीनं हिंछ्यादा निसें स्वीडादा तकया वसै याय्पिन्ता ल्यासे-ल्याम्होपुं जक धायो वयो च्वंगु दः । नेपः या युवा परिषद ऐन २०७२ काथं हिंखुदा निसें पीदातकया वसै याय् पिन्ता ल्यासे-ल्याम्होदक धायो तःगु दः ।

नेपः देशय् ल्यासे-ल्याम्होपिनिगु ल्या मुक्कं जनसंख्याया थं मथ्यं सच्छिखय् पीब्वः (४० प्रतिशत) अथे धाय्गु छगू करोड व न्हय्गू लाखम्हा दःगु धायो च्वंगु दः । थुली अपः ल्यासे-ल्याम्होया बः भीगु देशय् हे विकासया ज्याखय् छ्यलय् फःसा ‘समृद्ध नेपाल’ याय् मफैगु मखु । अलय् आजु चाय्पुगु खाँयां देया छवः हिलय् फःपुं अपलं क्वागु हि दःपुं (उर्जावान जनशक्ति) ल्यासे ल्याम्होपुं मध्ये नीन्यदा निसें नीच्यादातकया थं मथ्यं सच्छिखय् न्हय्गू (७० प्रतिशत) ल्यासे-ल्याम्होपुं विदेशय् वाडः च्वंगु ल्या पिब्वयो तःगु दः ।

बांबां लापुं डाक्टर, इञ्जिनियर, वैज्ञानिक, विशेषज्ञपुं अपलं मनूत विदेशय् वानय्गु हे बांला ताय्कः च्वंगु दः । लाहातय् ज्या दःपुं बांलापुं दक्ष जनशक्ति विदेशय् वासेलिं भीगु देश गथे विकास जुई ? अजगु जनशक्ति भीथाय् सं छु याः सा तयो तय् फै ? सरकारं बिचः याय् मःगु मखुला ? छु ? न्ह्याब्लें विदेशी तय्के लाहाफयो भीगु दे च्व जाइला ? ल्यासे ल्याम्होपिन्के राजनीतिक सचेतना म्हवः जूगु, थःगु देशता माया मयासैं देशभक्तिया भावनां मप्यागुलिं विदेशया माया मोहलं तपूगु खानय् दः । राजनैतिक दलं ल्यासे-ल्याम्हो पिन्ता देश विकासया ज्याय् छ्यलय्ता राज्यं मः काथंया सीपमूलक तालिम बियो राजनैतिक रुपं ज्ञान बियो देश भक्ति भावनां जायकः बिय मः गु खः । गुल्लेतक ल्यासे-ल्याम्होपिन्कय् देता थः गु तुतिखय् थः हे दानय् फय्केगु मतिं प्याकः बिय फैमखु उल्ले तक देया छवः हिइकेगु खाँ ज्या खाँ खय् जक डाय्क च्वनिगु पक्का हे खः ।

भीगु देशं स्वसः प्यसः ल्यासे ल्याम्होपुं ज्या मालय्गु नामय् विदेशय् वाडः च्वंगु दः । खुडगु -न्हय्गू लाखम्हा ल्यासे-

ल्याम्होपुं विदेशय् वाडः हि चःति हाय्कः ज्या साडः च्वंगु दः । अमिपाखं वैगु रेमिट्यान्स (करपाखं वडगु धेबां) नेपः या अर्थतन्त्र न्ह्याडः च्वंगु सरकारं धायो च्वंगु दः । वांगु आर्थिक वर्षय् रेमिट्यान्सजक गुगू खर्ब खुईछगू अर्बतका दां द्रहं वगु ल्याचा पिब्वयो तःगु दः । हिंडागू खर्ब बजेट दःगु देशय् रेमिट्यान्स गुगूल्या खर्बतका दां स्वयो अपः द्रहं वगुलिं नेपः या अर्थतन्त्रया अपलं अपः धेबा (हिस्सा) कतया भरय् लाडः च्वंगु दः धाय्गु खाँ मखु धाय्गु थाय् मरु ।

न्ह्याक्वहे धेबा रेमिट्यान्स काथं दुकः सां उकिता थःगु तुतिखय् थः हे दानय्गु स्वाधीन अर्थतन्त्रया मिखालं स्वयगु खः सा बांलागु दक धाय् फैमखु । अः ल्वचं महामारीयाडः च्वंगु ई खः । हलिमय्या फुक्क धाय्थें देशय् द्रहंय्हे (आवज-जावत) जुय मरुगु ई खः । नेपः देशं ज्या मालय्गुया निंतिं विदेशय् वानय्ता च्वडः च्वंपुं द्रलं नेपः मिपुं थी थी (कारणं) हुनिं याडः वानय् मफयो च्वंगु दः । थी थी देशय् ज्या साडः च्वंपुं नेपः या ज्यामित ज्यामदयो ज्याखं लिकायो हःगु बुखाँ पिब्वयो च्वंगु दः । अपुं थः गु दे नेपालय् वयमाला दकः सरकारकय् हारगुहार (ग्वाहाली) फवडः च्वंगु दः । अमिता नं सरकारं छुं हे बन्दोबस्त याय् फःगु मरुनि ।

ल्यासे ल्याम्होपुं दे त्वःत विदेशय् वानिगुया मू हुनि थानाया शासक राजनैतिक दलत हे खः । अमिसं भीगु देया ल्यासे-ल्याम्होपिन्ता भीगु देशय्सं तय्गु वातावरण मदय्कगु जक मखु, भीगु देशय् च्वडां छु याय् धाधां विदेशय् वानय्ता ग्वाकः च्वंगु दः । शासकदलतय्सं थः थः गु मातृसङ्गठन दुनय् लाखौं ल्यासे-ल्याम्होपुं दःगु खाँ धायो च्वंगु दः । अलय् अजपुं ल्यासे-ल्याम्होपिन्ता राजनैतिक शिक्षा बियो देश विकासया ज्याखय् छ्यलय्गु बिचः मया । भन राजनैतिक जूपुं युवासङ्घया न्हयलुवा जुयो च्वंपुं हे (ब्यक्तिगत फाइदा) थः जक नय् थः जक त्वनय्गु ई पिडः ज्या साडः च्वंगु दः । गुकिं याडः क्वय्-क्वय्या कार्यकर्तापिंकय नं अजगू बाँमलागु लिचवः प्याहाँ वल । उकीं अमिसं नं अथेहे जुयगु मति तयो ज्यासान । गुलि नं युवासङ्घया न्हयलुवा जुयो च्वंपिसं धायो च्वंगु दः । “पार्टीया निर्देशनय् च्वनय् मःगु छाय् ?” अथे धाय्गु ल्यासे-ल्याम्होपुं थः यत्थें जुय दै । थजगु बिचलं युवा संघय् दुथ्याकः च्वंपुं थौ पद, धेबा व अवसरया निंतिं जक ज्या सानय्गुलि पला छित ।

छखय् भीपुं ल्यासे-ल्याम्होपुं विदेशय् वाडः च्वंगु दःसा मेदखय् भारतीयत नेपालय् वयो ज्यासाडः कमेयाडः च्वंगु दः । नकतिनिजक पिब्वगु बुखं काथं च्यागू लाखम्हा भारतीयत नेपालय् वयो ज्या साडः च्वंगु दः । सेवा व्यवसाय तःतः हांगु उद्योग, सिसावुसा मियगु, साँ च्याकय्गु, छँ दानय्गु, रङ्ग पाय्गु ,



खुड्यागुगु स्वप पौ. बःखि पौ(पाक्षिक)

बिजुली मता तय्गु व त्वनय्गु नाः या पाइप जोडय् याय्गु ज्या याडः च्वंगु दः । अजगु ज्याखय् अमिता पाडः सरकारं थःगु तुतिखय् दानय् फैगु तालिमत गथेकी- सिँज्या (काष्ठकला), सिँकःमि, लोहँ ज्या (प्रस्तर कला) लोहँकःमि, डकःमि (अवःज्या), सुज्या सुय्गु ज्या मोटर साइकल ल्हवनय्गु, रेडियो -टेलिभिजन ल्हवनय्गु ज्यात स्यनय् फै । थथेयासा भीगु देया अरबौ तका दां विदेशय् वानिगु थः थाय्सं लाकय् फै ।

ल्यासे-ल्याम्होपुं शैक्षिक काथं गुलि बांलाकय् फता उलि हे देश व समाजया लागिं भिं जुई । शिक्षा, मदय्कः छुं नं देश वा सुं नं मनू त हज्यागु इतिहास मरु । अलय् च्वय् थ्यंकः ब्वडः उच्च शिक्षा काय् धुकानं देश व समाजया च्यूता मतसैं व्यक्तिगत फाइदाया लागिं धेबाया ल्यूनय्-ल्यूनय् जक ब्वाकः जूइपुं यक्व हे दः । श्व हे देया थौं याय् तः हांगु समस्या खः ।

गुलि नं ब्वडः च्वंपुं ल्यासे ल्याम्होपुं च्वय् थ्यंकया ज्ञान काय्धुकः जितिग्यम्हा सुं हे मरु जक घमण्ड याडः जूगु नं खानय् दः । अमिसं थः ति सः स्पृम्हा समाजय् सुं हे मरुथें ताय्किगु । अलय् थः परिवार -जलाखाला व अजगु वातावरण चूलाक ब्य पुं राजनैतिक पार्टी व उकिया न्ह्यलुवा पिन्ता गन्ता मदय्क छ्वइगु डाक्टर, इञ्जिनियर व पि एचडी याय्ता सुयाय्गुं छुं हे ग्वाहाली व घ्वासा मदय्क थमनं हे याडागु थें व्यवहार याइगु ।

पार्टी व समाजया न्ह्यलुवापिसं समाजय् ह्यूपा ह्यूता जेलनेल प्रवास व सुचुक-सुचुक भूमिगत जीवन हाड नं निरडकुश शासन व्यवस्थाया विरुद्धय् मल्वागु जूसा निरडकुश शासन व्यवस्थाय् नं समाजय् ह्यूपा ह्यमः दक थःगु छँ, फल्चाय्, सतलय् व छाप्रो ग्वयो ब्वनय्कुथि मचाय्कगु जूसा थी थी कलेजत मचाय्कगु जूसा छु थौंथा ल्यासे-ल्याम्होपिसं थुलि अःपुक थौंथाय्गु सुविधा काय् फैगु खः लालय् ? गुकिया विषय नुगलं वाय्कः बिचः मयासं मगा । थमनं कायागु डिग्रीया दसिपौ क्यडः न्ह्यौं तः पुकः जुइपुं मनूतय्सं थः ब्वडागु स्कूल, कलेज निस्वानय्ता दुःख स्पूणं न्ह्यलुवा पिन्ता लुमांक स्वःसा सिई व डिग्री स्वयो अपलं तः हांगु योगदान यां समाजय् ह्यूपा ह्यूता जूपुं सामाजिक - राजनैतिक कार्यकर्तापिनिगु दैगु जुयो च्वना ।

दे हछ्याय्ता समाजवादी बिचः कः घाडः वैपुं अपलं मनूत मदय्क मगा । देश व समाजया सेवा याय्गु भावनां प्यापुं ल्यासे-ल्याम्हो पिनिगु शक्ति कः घाडः हछ्याय् फः सा छुं नं प्रतिक्रियावादी शक्तिं अमिता पानय् फै मखु । अलय् अजगु इलय् प्रतिक्रियावादी पिसं क्रान्तिकारीपुं थें हे च्वंकः थःपुं खाँ थ्यकिपुं गुप्तचरत थी थी युवा संघय् मसिइकः दुतिड तय् यो । युवा संगठनं थजगु विषय तस्कं वा चाय्कः जुयमः । शोभियत संघ थजगु शक्तिशाली पार्टी व संगठनयन्पुं मखुपुं व प्रतिक्रियावादीत दुतिड भारी क्वथाय् खिचा द्रहँ वांभलय् थें हिदा-नीदाखय् अखय्ला-थखय्ला मदय्कः तहस-नहस यागु घटनां फुक्कं सिनं शिक्षा काय्फः।

थः ता थमनं तःहां छुडः घमण्ड याडः जुइपुं, कतया योगदानया छुं हे च्यूता मतसैं कतः गन्ता मरु थः पता मदय्क जुइपुं,

अनेक लोभ-लालचय् भुडः जुइपुं ल्यासे-ल्याम्होपिन्ता प्रतिक्रियावादीपिसं मथां हे थःगु जालय् क्यंकी । छगूताकाय् संगठन व पार्टीखय् न्ह्याक्वहे दुःख सियो ज्या साडः योगदान याम्हा जूसां घमण्डया ख्वपां पुय लातकीं धःसा व गालय् दुनिगु पक्का जुई । उकीं हे धाय्गु यागु खः -शत्रुया गोलीं छ्याय् मफूपुं क्रान्तिकारीपिन्ता चाकुगु माकुगु खाँखं भुडः मारी क्यडः क्व लाय्गु ज्या याई ।

ध्वाथुडकः स्वयगु खःसा तापाक्क वानय् म्वँ, माओवादीता स्वयवं गा । अमिसं हिदातक सशस्त्र संघर्ष याता, सरकार व माओवादीया पाखं याडः हिं न्ह्यद्व स्वयो अपः मनू स्याता, स्याकला, उकिया पलिसा जनतां छु काला ? अः गुलि जिवय् कःगु गोली ज्वडः छटपटी जुयो म्वाडः च्वना, गुलिख्ववी हाय्कः म्वाडः च्वना, गुलिं न्ह्यलुवा तय्ता ब्वः ब्यू ब्यू विदेशय् वाडः च्वना अलय् गुलिं पूर्व लडाकुत माओवादी न्ह्यलुवा तय्ता कुं खिडः विरोध यायां संघर्ष याडः वयो च्वंगु दः । अलय् न्ह्यलुवात धःसा चां न्ही वहे पदया लागिं सिद्धान्त छुवे छ्वयो प्रतिक्रियावादीत नपां मोर्चा, गठ बन्धनया नामय् जनताता मिखालय् धुलं छ्वाकः कुसीं घय्पुड च्वडः च्वना । सिद्धान्त व बिचः याता स्वयो अमिसं पद हे च्वय तयो ज्या साडः च्वंगु दः । माओवादीया नायो प्रचण्डं फुक्क सिया हः नयँ हे धःगु दः - 'जिमिपुं फुक्क सांसदत मंत्री जुयगु मति तयो च्वना । मन्त्री जुय मखाना दक पार्टीता बांमलाक कुखिड च्वना ।' श्व गजगु कम्युनिस्ट पार्टी खः ? छम्हा माओवादी सांसदयां वयाता मंत्री मयासा यग्गायो सियगु दक नं धायो च्वंगु खाँ प्याहाँ वला । माओवादीया सशस्त्र संघर्षखय् जुयो दलद्व ल्यासे ल्याम्होपिसं जीवन बलिदान यागु छु श्वहे पुँजीवादी व्यवस्थाय् मन्त्री जुयता, तयां तय्थाय् मदय्कः अकुत सम्पति मुनय्ता ? अलय् थः काय्-म्हयाय् भौपिन्ता मुख्य मुख्य पदय् थ्यंकय् ताला ? प्रचण्डं नेपाली जनताता लिसः मब्यसे मगा ।

माओवादी, एमाले थजपुं नां जकपुं कम्युनिष्टपार्टी राजनीतिता मथां धेबा कमय् याय्गु न्ह्यबसा थें याडः च्वंगु दः । व पार्टीखय् जूपुं ल्यासे-ल्याम्होपुं मखुगु लौपुई डः गुया मू हुनि श्व हे खः । देश व जनताया सेवा याय्गुलि मन क्वसाय्कगु खःसा व पार्टी व देश थौंथा स्थिति क्वहँ मवानिगु खः । गथे थ्वँ, ऐला-भाड थजगु लागु पदार्थ त्वनिपुं ल्यासे-ल्याम्होपुं अजगु कुलत मथां त्वः तः प्याहाँ वय मफैगु खः अथे हे राजनीतिखय् धेबा व पदया लागिं ज्या सानिपिसं छुं नं इलय् पार्टी व देशता धोखा बियफः । अः संघ सरकारनिसं लुम्बिनी गण्डकी प्रदेशया सरकारया स्थिति श्व हे खाँ खः दक क्यडः च्वंगु दः । न्ह्यलुवापिसं छु स्यना, पदया मनू तय्सं छु क्यना, कार्यकर्तापिसं नं वहे सय्की । प्रचण्ड, माधव नेपाल, के पी ओलीया पदया निंतिं हे ल्वाय्गु व थः ता मब्यसे मगागु बानी याड थौं कार्यकर्ताया तहलय् नं उगु ल्वय् पुनय् धुंकगु दः। पार्टी जक मखु देश व समाजता हे ध्वगिकः छ्वइम्हा न्हम्हा भाइरस काथंया प्रवृति खानय् दयो वयो च्वंगु दः । थौं या ल्यासेपिसं थजगु खाँ थुडकः अजगु बानी चुं थयो देश व जनताया लागिं हज्याय्ता इलं सः तः च्वंगु दः ।



खुड्यागूगु खप पौ. बःछि पौ(पाक्षिक)

साविक मापदण्ड काथं दांगु छँ (भवन) या नक्सा पास व सूचिकरण सम्बन्धी कार्यविधि २०७७' य् छपुलु



डा. हरिराम सुवाल
वडाध्यक्ष खप नगरपालिका-६

खपया थी थी नगरपालिका मध्ये खप नगरपालिका नं छगू ऐतिहासिक व पुलांगु नगरपालिका खः । नगरपालिका घोषणा जुयता कानूनं निश्चित मापदण्ड दयकः तःगु दः । गुकी नगरपालिका दुनयँ व्यवस्थित बसोबास जुयमः । व्यवस्थित बसोबासया लागिं नगरपालिका नक्सा पास याड जक छँ दानय्गु स्वीकृति बियगु याई । नक्सामतसँ नगरपालिका छँ दानय्ता स्वीकृति बिइमखुसा नगरपालिका थमनं हे नं आवास योजना ग्वसः ग्वयो न्हँ न्हँगु थासय् बसोबासया व्यवस्था याय् फै । थुजगु ज्याखय् खप नगरपालिका तस्क. हःनयँ ला । लिबाली आवास योजना, कमल विनायक आवास योजना, तुमचो दिगुरे आवास योजना थुकिया स्यल्लागु दसु खः । अः खप नगरपालिका देको मिबा इटापाके आवास योजना न्ह्याक च्वंगु दः । व्यवस्थित आवास याकय्ता थजगु आवास योजना मन्ह्याकसँ मगा । अलय् नगरय्

दुनय् दानिगु फुक्क छँ नक्सा पास याडः दांसा अभ् व्यवस्थित याय् फै । खप नगरपालिका दुनयँ नं अपलं छँ नक्सा पास याड जक दांकय्ता थी थी मापदण्डत तयो तःगु दः सा गुलिं छँ थुवः तय्सं थी थी कारणं अः तक नं नक्सा पास याय् मफूनि । अलय् गुलि नं छँ थुवः तय्सं नक्सा पास याय्ता दर्खास्त तय हःसां नक्सा पास मजुगु खानय् दः । थथे हे खप नगरपालिकाय् जक मखु मेमेगु नगरपालिका व गाउँपालिकाय् नं थजगु अनियमित छँ दानय्गु यागु अपलं न्यनयँ दः । थथे अनियमित निर्माण जूगु छँ व मापदण्ड काथं दांगु छँ मेमेगु कारणं पास मजुगु दः सा स्थानीय सरकार सञ्चालन ऐन २०७४ या दफा ४२ स नक्सा पास सम्बन्धी विशेष व्यवस्था यागु दः । दफा ४२(१) काथं थुगु परिच्छेदय् मेथाय् न्ह्यागु हे खाँ च्वयो तःगू जुसां थुगु ऐन प्रारम्भ (दयके) हाँ उल्लेया प्रचलित कानुन काथं नक्सा पास मयासिं वा पास जूगु नक्साकाथं मदय्कसिं पाकः दयकगु छँया विषय भवन निर्माण सम्बन्धी मापदण्ड व संहिता पालना याडः दय्कगु खः सा नगरपालिकां थुगु ऐन दय्के धुडानिं छकया लागिं नक्सा पास याय्ता वा पास जूगु नक्सास्वयो पाकः दय्केता स्वीकृति बिय फः । स्वापु दःपुं मनूतय्ता ३५ न्ह्या म्याद बियो प्रमाण नपां तयो दर्खास्त बियता सार्वजनिक सूचना पिब्वयगू अलय् उगु म्याद दुनयँ दर्खास्त ब्य वलधःसा आना हे वाडः स्थलगत रुपं प्राविधिकत वाड स्वयो (जाँच बुझयाड) नपां लिक्कया साँध, संधियार तय्के नं न्यड भवन निर्माण सम्बन्धी मापदण्ड व संहिता पालना या मया स्वयो यकिन याडः खः सा नक्सा पास याय्ता वा स्वीकृति नक्सा छ्याय् फ्वाय् याय्ता मः काथंया दस्तुरया स्वदुगं दां पुइकः छकता नक्सा पास याय्गु व्यवस्था यागु दः ।

खप नगरपालिकां नं स्थानीय सरकार सञ्चालन ऐन २०७४ या दफा १०२ खं ब्यूगु अधिकार छ्यलः च्याकगू नगरसभा २०७७ काथं साविक मापदण्ड काथं दांगु छँ (भवन) या नक्सा पास व सूचिकरण सम्बन्धी कार्यविधि २०७७ पास याडः कार्यान्वयनय् हःगु दः । स्थानीय सरकार सञ्चालन ऐन २०७४ या दफा ४२ य् काथं नक्सापास सम्बन्धी विशेष व्यवस्था कार्यान्वयन याय्ता छिंगु लिं (वाञ्छीत जूगुलिं) अलय् खप नगरपालिका दुनयँ स्थानीय सरकार सञ्चालन ऐन २०७४ लागु जुय हाँ नक्सा पास मयासिं साविक मापदण्ड काथं दाड तःगु वा मापदण्ड काथं दय्क मतःगु वा पास जूगु नक्सा स्वयो पाकः साविक मापदण्ड काथं



खुड्यागुगु स्वप पौ. बःछि पौ(पाक्षिक)

दाडः तःगु छँ त व मापदण्ड काथं मजगुलिता उगु छँ नियमित काथं नक्सापास व सूचिकृत यायगु ज्या अः पुकय्ता स्थानीय सरकार सञ्चालन ऐन २०७४ या दफा १०२ (१) व (२) अलय ख्वप नगरपालिकाया प्रशासकीय कार्यविधि (नियमित यायगु) ऐन २०७५ या दफा ५ काथं थुगु साविक मापदण्ड काथं दाडः तःगु छँ या नक्सा पास व सुचिकरण सम्बन्धी कार्यविधि २०७७ तर्जुमा याडः लागु नं यागु दः ।

नगरपालिकां पारित यागु कार्यविधि छँ, भवन, टहरा, ग्यारेज पःखः, मंकः (सार्वजनिक) छँ व सामूहिक भवनया परिभाषा बियो तःगु दः । छँ, भवन धायबलय् अपा वा लोहँ वा चाखं वा सिमन्टी न्या वा सिँत निर्माण सामग्री छ्यलः दांगु संरचनाता धायगु धायो तःगु दः । 'टहरा' धाय् बलय् थःगु जग्गा ख्य न्याँया पाता वा अपा सिमन्टी वा चांकाक अपां वा सिँ वा ब्लक वा प्यानल बोर्ड वा पँ वा जस्ता व फेब्रिकत तयो च्वनय्ता वा छुं ब्यवसाय याय्ता दयकगु छता जक दाडः तःगुता धायगु धायो तःगु दः ।

ग्यारेज धायबलय् थःगु निजी जग्गाख्य न्यापाता वा सिमेन्ट काकः अपां दाडः तःगु वा चांकाकः अपां दाडः तःगु वा सिँ वा ब्लक वा प्यानलबोर्ड वा पँ वा जस्ता वा फेब्रिक छ्यल निजी सवारी साधन तय्ता वा व्यावसायिक रुपं मेपिन्ता ग्यारेज तय्केता दय्कतःगु ता धाई । पः खः धाय् बलय् थःगु जग्गाख्य सिमाना (चें) सिय दय्केता वा सुरक्षाया लागिं वा टेवाया लागिं सिमन्टी काकः अपां दाडः तःगु वा चांकाकः अपां दाडः तःगु वा सिमन्टी काकः वा चांकाकः ल्वहँत दाडः तःगु वा ब्लक दाडः तःगु पःख उकियाय् च्वय् न्यायायगु पोल थाडः तारबार वा जाली तयो दय्कः तःगु ता धाई । सार्वजनिक भवन (मंकः छँ) धायबलय् अनाथालय, बृद्धाश्रम, भ्वँछँ, सतः, तालिम भवन, सरकारी-अर्धसरकारी गैर-सरकारी सामाजिक संघ-संस्थाया भवन तय्ता धाई । सामूहिक भवन धाय बलय् स्कूल कलेज, भ्वँ छँ, दाफा भजनघर, सभागृह, द्योछँ सत थजगु छँ तय्ता धाई ।

थुगु कार्यविधिया दफा ३ नं नगरपालिका लागा दुनयँ ख्वप नगरपालिकाया भौतिक पूर्वाधार अलय निर्माण मापदण्ड - २०६० या स्वकगु संशोधन (हिला) थाय् हाँ नक्सा पास मयासीं वा नक्सा पास स्वयो पाकः दय्कः तःगु छँ, भवन, टहरा, ग्यारेज पःख नक्सा पास याय्ता नगरपालिकाय् निवेदन ब्यगु ३५ न्हँया सार्वजनिक सूचं सर्वसाधारणया लागिं पिथानय्गु व्यवस्था यागु दः । थथे सूचं पिथानय् धुडानिं दफा ४ रं निर्माणया नक्सा पास निवेदन विधमःगु ब्यवस्था यागु दः । उगु निवेदनय् क्वय च्वयो तःगु काथंया कागजात (दसि भ्वँत) मदय्कं मगा :

१. अनुसूची १ या निवेदनया न्हिथाडः तःगु फुक्क कागजातत दय्मः ।

२. दानय्गु थाय्या बस्तुस्थिति खानय् दैगु याडः निर्माण क्षेत्र व निर्माण याडगु संरचनाया ई-ब्या, व जः नपां सिय दैगु 'साइट प्लान' नपां व धायो तः काथंया हाँचा नक्सा खुपा ।

३. नक्सापास निवेदनय् प्रस्तावित निर्माण छु गथे याडः गुब्ले दांगु खः धायगु यकिन जुडगु प्रमाण भ्वँत (नगरपालिकाय् वडा निरीक्षक पेश यागु अनियमित प्रतिवेदन, उजुरी, निर्माण पर्चा, थजगु प्रमाणित प्रतिलिपि) वा अजगु प्रमाण मरुसा गुब्ले दांगु खः उकिया ब्यहोरा ।

४. नक्सापास निवेदनय् प्रस्तावित निर्माणया मोहडा खानय् दैगु किपात ।

५. दानय्गु थाय्या ज.ध. पूजा, सफाई कर नपां नगरपालिकाय् पुलय् मःगु कर तिरो पूःगु रसिदया फोटोकपी व नापी नक्सा ।

६. अनियमितता यागुलिं नगरपालिकाया निर्णय काथं जरिवाना पूगु निर्णयया प्रतिलिपि

७. स्वापु दःगु वडाया सिफारिस पौ

नक्सा पास याय्ता छँ दानिमहा छँ थुवः व

छँ दानय्थाय् च्वंगु प्रस्तावित निर्माणय्

ववय् च्वया काथंया शर्तत पालना याय् मः

१. नक्सापास निवेदनय् प्रस्तावित निर्माण गुब्ले दांगु खः ? धायगु यकिन याडगु भ्वँत (नगरपालिकाय् वडा निरीक्षक पेश यागु अनियमितया प्रतिवेदन, उजुरी, निर्णय पर्चाया प्रमाणित प्रतिलिपि) वा वहे काथंया प्रमाण मरुसा गुब्ले दांगु खः उगु ब्यहोरा काथंया स्वापु दःगु वडाया वडा कार्यालयया सिफारिस पौ ।

२. नक्सा पास याय्ता प्रस्तावित यागु निर्माण साविक मापदण्ड काथं निर्माण यागु (दांगु) जुयमः ।

३. नक्सा पासयाय्ता प्रस्ताव यागु थासय् दानिगु छँखं सार्वजनिक जग्गा त्यलः च्वंगु मजुयमः ।

४. नक्सा पासया लागिं धायो तःगु थासय् छँ दानय् धुंकः नक्सापास निवेदनयँ च्वयो तःकाथंया प्रयोजन बाहेकं मेमेगु प्रयोजनय छ्यलय् दै मखु ।

५. ब्यवसायिक प्रयोजनया लागिं नक्सापासया अनुमति कःगु छँ भवन टहरा व ग्यारेज दय्किपुं थुवः पिसं नगरपालिकां धः काथं ब्यवसाय कर नगरपालिकाय् पुलय् मः ।

६. छगू याता धायो नक्सा पास याडः मेगुया लागिं छ्यलय् मःसा नगरपालिकां छ्यलय् हाँ हे स्वीकृति काय्मः । थः च्वनय्ता जक नक्सा पास याडःदांगु छँ याता ब्यवसायिक प्रयोजनय् छ्यःगु खानय् दःसा उम्हा छँ थुवनं ब्यवसायया प्रकृति काथं नगरपालिकां क्वः छिडः तः काथंया ल्याखं



खुडच्यागूगु स्वप पौ. बः छि पौ(पाक्षिक)

व्यवसाय कर पुलय मः ।

७. नक्सा पास यागु छँ, भवन, टहरा वा ग्यारेज, नगरपालिकां याय् मरुधायो तःगु छुं नं ज्या याय् याकय् मरु ।
८. नक्सापासया लागिं प्रस्तावित निर्माणय् छुं भाति हिलय् मःसा नगरपालिकाया निर्देशन काथं जक याय् मः ।

पेश जूगु छँ दानय्ता ब्यूगु नक्सा पास निवेदनय् ववय् चवया काथं जुईः

१. निवेदन नपां दुथ्याक तःगु दसीया भ्वंत व थुगु कार्यविधिया प्रावधान व निवेदनय् चवयो तःगु ई या प्रचलित मापदण्ड काथं जू मजूगु स्वयता नक्सा उपशाखा प्रमुखं थः ववयया प्राविधिक पिन्ता जिम्मा बिई ।
२. जिम्हा कुब्यूम्हा प्राविधिकं नक्सापास निवेदन काय धुकः नक्सापास निवेदनय् निवेदकं प्रमाण नपां दानय्गु न्हि ल्या चवयो तःगु जूसा उगु न्हिल्या या तुरुन्त साविक काथं दांगु दः मरु धाय्गु आना हे वाडः स्वः वाडः प्रतिवेदन बिई ।
३. निवेदकं न्हि ल्या चवयो तःगु अलय् उगु सम्बन्धय् प्रमाण पेश मयागु जूसा प्रस्तावित निर्माण वयकलं चवयो तःगु न्हि ल्या सं दांगु खः मखु पक्का याय्ता सम्बन्धित वडा कार्यालय पाखं आना हे वाडः सर्जमिन याडः पेश याय्मः ।
४. चवयया ज्या याय् सिधलकिं नक्सापास प्रक्रियाया कार्वाही हज्याई । अलय् स्वापु दः म्हा निवेदकं साँध संधियार पाखं उब्ले हे अनुसूची २ काथं मञ्जुरीनामा पेश याडः तःगु लि साँध संधियारया नामय हिंडान्ह्या म्यादया सूचं जारी याडः चवनय् म्वः ।
५. निवेदकं पेश यागु नक्साखय् हिलयमःगु खानय् दःसा हिलयमःगु विवरण क्यडः स्वापु दः म्हा नक्सावालाता थुगु इलय् भासं धायो जानकारी बिई ।
६. स्वापु दः पुं प्राविधिक व वडा निरिक्षक जु पिसं नक्साखय् हिडकय् धुडानिं प्रतिवेदन नक्सा उपशाखाय् बिय मः ।

७. प्रतिवेदन ब्यूसेलिं नक्सा उपशाखाया निर्देशन काथं निर्माणया नक्सापास प्रमाणपत्रया लागिं सिफारिस याई ।
८. सिफारिस जुयानिं प्रमुख प्रशासकीय अधिकृत वा वयकलं सम्पादन याइगु नक्सापास नपांया ज्या याइम्हा अख्तियार प्राप्त अधिकारी निर्माणया नक्सा पास प्रमाण-पत्र जारी याई ।
९. निर्माणया नक्सा पास प्रमाणपत्र जारी याय् मफूगुलि सूचिकरणया लागिं सिफारिस अनूसूची ७ काथं याई ।
१०. निर्माणय् सुधार मयागु इलय् अजपुं निर्माणकर्तापिन्ता नियम काथं सूचिकरणया प्रमाण पत्र बिय फै ।

थुगु कार्यविधिकाथं सूचिकृत जूपुं नक्सावालापिसं थःगु छँ, भवन, टहरा सूचिकृत जुयानिं छवप नगरपालिकां छँ जूल दक जनय् याकेता भूमिसुधार वा मालपोत कार्यालयसं सिफारिस बिय फै अलय् सूचिकृत छँ भवनय् हिति तय्ता, बिजुली मता तय्ता सिफारिस बिय फै । अलय् सूचिकृत छँ भवन छगुतुं परिवारया दुजः पुं बाहेकं मेपिन्ता हक लः ल्हाडः बिय फै मखु । सूचिकृत छँ, भवन, टहरा, खय् छुं नं सरकारी कार्यालय/बैंक/सहकारी कार्यालय ववनय्कुथि/कलेज थजगु संस्थात बः लं बिय दै मखु । पतीं जग्गा सार्वजनिक जग्गा, लौं, विश्व सम्पदाया धलः खय् नां जायो चवंगु थासय् छँ भवनत व थिडक चवंगु संधियार पिनिगु जग्गा त्यलः दयकः तःगु छँ /भवनता सूचिकृत याइ मखु । अलय् उगु भवन थुडगु इलय् मुआब्जा नं बिइ मखु ।

छवप नगरपालिका नगर कार्यपालिकाया बैठकं सा विक मापदण्डकाथं दाडः तःगु छँ भवनया नक्सा पास व सूचिकरण सम्बन्धी कार्यविधि २०७७ कार्यान्वयन याय्ता उप-प्रमुख रजनी जोशीया कजिलय् डाम्हा दुजःदःगु अध्ययन समिति दय्केगु निर्णय यागु खः । थुगु समितिसं निर्माण समितिया कजि उकेश कवां, विधायन समितिया कजि डा. हरिराम सुवाल, नक्सा शाखा प्रमुख विश्व नाथ सुजखु, मुद्दा शाखा प्रमुख गणेशलाल फौजु दैगु ब्यवस्था याडः चवंगु दः । थुगु समितिं ३५ न्ह्या सूचं बियो दूतिंगु नक्साया फाइलत अध्ययन याडः ज्या याडः चवंगु दः ।

इनाप

छवप नगरपालिका पाखं पिथाडः चवंगु स्वप पौ बः छि पौ खय् बांलागु चवसु त बियो ग्वाहाली याडः दिसं । उगु रचनाया ल्यः ज्या याडः पारिश्रमिक बियगु खाँ छवप नगरपालिकाया २०७७ श्रावण २६ गते चवंगु बैठकं क्वः छ्यूगु खाँ ब्याक चवडा ।

सम्पादक
स्वप पौ



खुड्यागुगु स्वप पौ. बःखि पौ(पाक्षिक)

गुंलाया सुभारम्भ

आशाकुमार चिकंभजार



नेवः समाजय् वैगु दाच्छीतकया हिं नेला दुनयें गुलाँथव व गुलाँगा सं गुलाँ महिना काथं डाल वयो च्वंगु दः । स्वनिगलय् थुगु पर्वयाता हिन्दु व बौद्ध धर्माबलम्बी पिनिगु समन्वय काथं छ्यलः च्वंसां बौद्ध परम्पराया लिधंसाय् श्रावण शुक्ल प्रतिपदा निसें श्रावण कृष्ण औसीतकया लच्छी तक गुलाँ पर्व मानय् याई । उप-प्रा. पुष्प रत्न शाक्य जुया धापु काथं “गुलाँ खाँवः या अर्थ छ्याय्गु खः सा ‘गुँ’ व ‘ला’ आखः मिलय् जुयो गुँला खाँवः जूः गु खः । गुँ या अर्थ गुण व ‘ला’ या अर्थ नेपाल भाषा या महिनाता धाइगु खः । गोपाल राज वंशावली सं गुँला ता ‘गुणिला’ खाँवः च्वयो तःगु दः । उकीं थुगु महिनाता गुण लुमांकः धर्म याय्गु महिनादक छ्यलः वयो च्वंगु दः ।

साउन महिना ज्याखं भाति फुसंत दैगु महिना जूगुलिं (कृषि) बुँ ज्याखं थःगु जीवन हाडः च्वंपुं किसानतय् भ्या भाति फुसंद दैगु ई नं खः । थुगु ई याता छ्यलय् काथं साउन महिना धर्म कर्मया महिना दकः धायो वगु खः । गुलाँया बुद्धबारयाता तस्कं महत्व बियो प्रत्येक बुद्धबार प्यम्हा भगवान

सिङ्कः वानय्गुदक अपलं धर्माबलम्बीपुं वानिगु चलन अः तक नं दः नि । थुकीं सु बौद्ध सु हिन्दु सकलें उलिहे भक्तिभाव ज्वडः देकय् वानिगु खः । थव छगु तस्कं स्यल्लागु धार्मिक सहिष्णुताया दसुखः । गना छुं काथंया धर्मया त्वापु मरु । गुलाँ बाजा ज्वडः बौद्ध धर्माबलम्बीपुं भाई सा बाँसुरी, धिमे ज्वडः हिन्दु धर्माबलम्बीपुं भाई । अः वयो सुमनू सीत धःसा उम्हा प्यम्हा भगवानधाय् मता च्याकय्गु चलन नं याड हल ।

गुलाँया न्हापांगु बुद्धबार खुनुं काभ्रेया नमोबुद्ध (नम्रा भगवान) थाय् वानि । नेवः समाजय् ‘नक्वतिक्व पच्च, नम्रां उखय् दच्चः’ धाय्गु खँत्वा खँ भाय् नं छ्यल वयो च्वंगु द । न्हापा हे जिं छक च्वयागु खः, सायद स्वनिगः त्याकय् धुकः जुजु पथवी नारायण शाहं थाना तक त्याकय् मफू गुलिं धन सम्पति ज्वडः दच्चय् च्वँ वांसा जुजु पाखं सुरक्षित जुडगु खः ला ? धाय्गु नं कथं । अलय् दच्चय् अपलं थानाया नेवः (भुजु, श्रेष्ठ) पुं दःगुलिं वयकपुं एकिकरणया इलय् बिसेवाडः च्वंपुं खः ला धाय्थें च्वं । अलय् नम्रा व दच्चया

दशवी वैगु छगु महोद्योया देगः आनाया सायँ (तामाड) जुजुं थुड ब्यूगु स्थानीयया धापु काथं आना न्हापा सायँतय्गु सामन्त दःगु खःला ? वा हिन्दु देगः तछ्याड ब्यूगु खःला ? अनुसन्धानया विषय खः ।

नम्रा द्यो (नमोबुद्ध) देगः हः नयँया द्यो मञ्जुश्री खः दक च्वया । अलय् ०४५ साल पाखय् आनाया स्थानीय (तामाड) लामा जु पिसं चिच्यागवःगु बुद्धया मुर्ति तयो उगु नम्राद्योया हः नयँ देगः चा छगः दय्कः गुया कारण नं सिङ्कय् बहजु ।

नमोबुद्धया वियणयलय् छगू किम्बदन्ती नं लोकं हवा । उगु लोकं हवागु किम्बदन्ती काथं महासत्व राजकुमार नपां वया जेठाम्हा, माहिलाम्हा दाजु नपां मिलय् जुयो सिकार म्हेतः वांगु जुल । सिकार लिङः यंकय्गु इवलय् स्वम्हा राजकुमार पुं जक जडगलय् दशवी लाडः लाँ बित । बः न्हि जुयो वसेलिं स्वम्हां राजकुमारपुं जडगलय् बाय् लाडगु जुल । अलय् कान्छा राजकुमार महासत्वयाता पः तयो जेठा व महिला राजकुमार देन । चान्हयँ जडगलय् धुँ हःगु सः ताय् दत । सः हःनय् हःनय् वसेलीं



खुड्यागूगु स्वप पौ. बःछि पौ(पाक्षिक)

महासत्व राजकुमार सः न्यं न्यं आना हे स्वः वान । आना थ्यं बलय् छम्हा मा धुं मचाबुइकः पित्याडः सानय् मफयो च्वंगु अवस्थाय् खान । अलय् राजकुमारया हः नयं व माधुं थम्हा बच्छी मचात नयो थःगु पित्या ताड्केगु स्वःगु महासत्व राजकुमारं खान । अलय् महासत्व राजकुमारं अथे यायमते जक गान । थुकीं मातृवात्सल्य हे दाग किङ्गुलिं बरु थःगु ला ध्यड नकेगु खाँ काडः गान । धुं थुगु खायँ विश्वास मयासें धाल-गना मन् व धुं शत्रु, नै व नसा । अलय् सुर्योदय जुयवं धुं बच्छी लूम्हा सुजद्यो यायके मन् नपामलाक जक फ्वनिगु खाँ कांसे धुं थः मचा नयताबलय् राजकुमारं थः दाजुपिन्के बिदा कायो वय दक बाचा याडः वान । कः सा उब्ले तक लानय् धः सेलिं महासत्व दाजुपिन्थाय् वयो देड च्वं पिन्थाय् वयो बिदा फ्व बलय् साँह्यँ (नेवःतय् तस्कं विजोग जुई बलय् फिडां फिय् मफय्क वैगु न्ह्योयाता धायो तः काथं) वयो च्वंगुलिं दाजुपिसं न्ह्यो फिय मफःसें न्हयल्य हे धुं याता स्याय्ता वयापिसं धुं याता छाय् म्वाकय्गु ? हालेमते धायो देन । अलय् महासत्व राजकुमारं थःगु बाचा वान धायो वहे माँधु याथाय् वयो थःगु लाः ध्यडः नकला । अलय् ला नकय् धुंक थःगु स्वँ, स्यलौं नयो मथां बिसे हँ मखुसा थः दाजुपुं वयो स्याई धा धां प्राण त्वतल । सुथाय् जुयो वसेलिं दाजुपुं थ किजा मखांसेलीं किजा माँ मां वांबलय् थः किजाया तिसा, वस, तरबारफुक्क नपां वयागु क्वँ (कङ्गाल) जक ल्यं दःगु खान । वहे थासय् फुक्क पारमिता पारयाडः बुद्ध त्व प्राप्त यागु खाँ थुइकः व हे थासय् महासत्व राजकुमारया अस्थिरपञ्जर थुडः चैत्य दय्कगु किम्बदन्ती दः । गुकीया म्यँ अः नं हालय्गु यागु न्यडा । अलय् थुगु किम्बदन्ती नं लोक बाखं काथं कानय्गु याड वयो च्वंगु ल्यं हे दः नि ।

मेगु धापु काथं मञ्जुश्री स्वनिगः या नाः पिता छ्वयगु बिषय बिचः याय्ता न्हः पां श्वहे पर्वतय् वयो च्वंगु खाँ नं धायो च्वंगु दः । नपां तिब्बतं निसें क्यान्छेलामा म्हादुदाडः थाना तक खुला बिक वःगु खाँ गुरुबर वाडमय शताब्दी पुरुष सत्यमोहन जोशी जुं धायो द्यगु नं न्यडा ।

गुलाँ लच्छी बुद्धबार प्यम्हा भगवान काभ्रे (नम्ना) या नमोबुद्ध, साँक्वयया बज्रयोगिनी, स्वयम्भूया भगवान, बोडयाया करुणामय, बौद्धया खास्ती भगवानया दर्शन यो वानिगु धायो तःसां स्वनिगया बाहा, बही चैत्यसं गुलाँ बाजा थाडः सुथाय् सुथाय् चाहिलय्गु याडः च्वंगु दः । थुगु इलय्



बुद्धया जिवंकः छिया खाँ (जीवनी), बुद्धया पुर्वजन्मया जातक बाखंत न्यनय्गु प्रज्ञापारमिता, नकग्रन्थ त ब्वनय्गु, न्यनय्गु बाहाः बही सं सुथाय् बहनी नामसङ्गीत भद्रचरी नपां थी थी स्तोत्र पाठ याड बुद्धया उपदेश डाल काय्गु याई । गुम्हां सिन. थुगु इलय् लाः, श्वँ, ऐला चुरोट त्वः त संघया गुण डालः काय्गु कुत याई । (पुष्परत्न शाक्य)

हिन्दु धर्माबलम्बी पिसं धः सा वहे बुद्ध बारयाता जक छ्यलः थःगु बुई सःगु लाजा धे, प्वहँचा, तुसी, पासी छाय्गु याई । थुगु इलय् अपलं ल्यासे ल्याम्होपुं देकय् वाडः मतिना जुइगु खाँ नं धायो तःगु दः । अः याय्थें स्कूल, कलेज, टिभी, मोबाइल मरुगुलिं अजगु ई याता छ्यलः

तःगु जक नं धाई । नपां थुगु इलय् ल्यासे चापुं थः ब्वय दः कतः स्वयदः धायो फलय् वयो कपायँ फेनिगु खाँ नं लोकम्यँ काथं हाल वयो च्वंगु दः । गथेकी- गुलाँ लच्छी कपायँ फ्यडा.

कतु स्वतु मजः

जिमी मामं जिता ब्वः बिल ।

बानलाक समायाय लाछी फलय् ज्या ज्वँ वानय्

न्यातु सुखुया क्वापी मकचा ज्वँ ना ॥

थथे ज्या स्वयो स्वय्गु व ब्वय्गु याडः च्वाकीं जुयो च्वम्हा छम्हा ल्यासेचा हथु दः म्हा साजन भाजु नपां भुल्य जुयो नेगु जिउ जुयानिं त्वः त ब्यगु व मचा बुम्हा नं म्हायमचा बुला दक लायँ दशवी वाकय् छ्वगु लैङ्गिक बिभेद व इहिपा न्हाया तेपुया स्वापु खं वैगु विकृतिता पाडः तय्ता लोकम्यँ त चिडः तःगु अः संरक्षणया अभावं पुर्खातुं ज्वड वानिगु सम्भावना अपलं दय् धुंकल । उकीं थुगु लागाया मनूतय्सं थजगु म्यँ मुडः पिथानय् मःफूसा भनीगु तस्कं बांलागु साहित्यत इतिहासया प्वाथय्सं तुसुड मवानि मखु ।

थुगु इलय् हालिगु म्यँ, शिलु तिर्थया म्यँ गना जुजुया अत्याचार पिब्वयो तःगु जुल । अथेहे सितला माईया म्यँ जुजुया निर्दयी स्वभावपिथाडः तःगु जुल अथेहे साँ देया म्यँ थःगु दे त्वःत विदेशय् दां कमेयाय् दक वांगु नपां उब्लेया सती प्रथाया दुःखद कहानी गुगु मुना मदनया अग्रज दक धायो तःगु म्यँ अः याय न्हूंगु पुस्तां महःगु जक मखु मथुय धुंकल । गुलाँया महत्व नपां थुगु तुकाज्या म्यँ याय नं साहित्यिक अवस्था, भाव, ऐतिहासिक पक्ष, लोक लय्, प्रतीक, नपां छगू छगू पक्ष कायो च्वयो न्हूँ गु पुस्ताता कानय् फः सा गुलाँया महिमा अभ् बल्लाई, अभ् स्यल्लाई ।



खुड्यागुगु खप पौ. बःखि पौ(पाक्षिक)

खप नगरपालिकाया ज्या भवः त

इसिडी शिक्षिका पिनिगु ज्ञापन-पत्र

साउन ३१

पूर्व प्रा.वि. तगिल्य ज्या साड च्वंपुं शिक्षिकापिसं खप नगरपालिकाया प्रमुख सुनिल प्रजापति जू याता आइतबार ज्ञापन पत्र ब्यूगु दः । नगर प्रमुख प्रजापति जु याता ईसीडी संघर्ष समिति,



खपया नकी श्वेता छुस्याकी खुगु बुँदाया माग नपांया ज्ञापन पत्र लः ल्हागु खः ।

ज्ञापन -पत्र लः ल्हाडः कायो दिसे नगर प्रमुख प्रजापति जुं नगर दुनय न्ह्याक तःगु सामुदायिक ब्वनय कुथि सं ज्या साडः च्वंपुं

इसिडी शिक्षकपिन्ता बियो वयो च्वंगु प्रोत्साहनया धेबा थुगुसी नं बियागु खाँ ब्याकसे (परिस्थिति हिल वलकिं) ई काथं छिनकिं बांगु दायँ थें तालिमत वियगु ज्या हछ्याई ।

वयकल संघ-सरकारं घोषणा यागु काथं शिक्षक पिनिगु तलब समायोजनाया लागिं मः काथंया ब्यवस्था यायगु खाँ ब्याकसे कोभिड महामारीया हुनिं पर्यटन लागाय् बांमलाक लिचवः लागु खाँ नं ब्याक दिल ।

आधारभूत ब्वनय कुथिया शैक्षिक स्तर थाकाय्ता फुक्क ब्वनय कुथि मः काथंया शैक्षिक सामग्री बियो वयो च्वंगु खाँ ब्याकसे इसिडी शिक्षक पिनिगु समस्या नगरपालिकां बांलाक थू धायो दिल ।

उगु ज्ञापन पत्र सं पूर्व प्राथमिक तहया शिक्षकपिन्ता तलब बढ्य याय मःगु, बालविकास केन्द्रया शिक्षक पिन्ता 'मन्देश्वरी विधिया तालिम' बियमःगु, शैक्षिक सामग्रीत बिय मःगु, बाल विकास केन्द्रया मचातय्ता मः काथं स्याहार सुसार यायता नीम्हा मचा तय्ता छम्हा आयादिदी तयो बिय मःगु मागत दुथ्यागु खः ।

नेपाल क्रान्तिकारी शिक्षक संघया गणेश राम थुसा जुं खप नगरपालिकां शिक्षाया लागाय् याडः च्वंगु च्वछाय् बहःगु ज्या खः धायोदिसे इसिडी शिक्षकपिनिगु मागकाथं हे पूं वांकिगु विश्वास प्वंकसे नगरपालिकाया ध्यानाकर्षण याड दिल ।

नेपाल बैंक लि. या कचा निस्वान

आद्र १

नेपाल बैंक लिमिटेड खपं खप नगरपालिका वडा नं. १ दूधपाटी एक्सटेन्सन काउन्टर थौं निसें चाय्कल । खप नगरपालिकाया प्रमुख सुनिल प्रजापति जुं उगु एक्सटेन्सन काउन्सिल मंगलबार छगू ज्या इवः याडः उलेज्या याडः दिल ।

ज्या इवः सं प्रमुख प्रजापति जुं नेपाल बैंक लि. जनताया अपलं विश्वास दःगु बैंक जूगुलिं खप नगरपालिकां सरकारया अपः लगानी दःगु बैंकता च्वछाय्मःदक नगरपालिकाया फुक्क कालबिल थुगु बैंक पाखं याडः च्वडागु खाँ ब्याकः दिल ।

प्रमुख प्रजापति जुं सिंहदरबार दुनयं जुइगु फुक्क आर्थिक कारोबार विदेशी लगानी दःगु बैंक पाखं याडः वयो च्वंगुलि आपत्ति प्वंकसे थुकिं नेपः या महत्वपूर्णपुं मनूतय्गु सूचं फुक्क प्याहाँ वानिगु सम्भावना दःगु खाँ ब्याक दिल । सिंहदरबार दुनयं सरकारी स्वामित्वया बैंक पाखं हे कालबिल याय मःगु बिचः प्वंक दिल ।

सरकारं विदेशी लगानी दःगु निजी बैंक तय्ता हदाय् तःगु हुनिं हे सरकारया पाखं न्ह्याकच्वंगु बैंकत गालय् दुडः वानिगु खतरा अप्वयो च्वंगु खाँ वयकल प्वंकः दिल ।

भक्तपुर बहुमुखी क्याम्पस प्रमुख डा. कृष्ण प्रसाद पोखरेलजुं नेपाल बैंक लि. नेपः याय हे दकल्य पुलांगु व गौरब ज्वडः धस्वाड च्वंगु संस्था खः धायोदिसे बैंक सेवाग्राहीपिन्ता न्हँ न्हँगु प्रविधि व न्हँ न्हँगु सेवा सुविधात बियो च्वंगु दः धायो दिल ।

नेपाल बैंक लि. वागमती प्रदेशया प्रमुख निलुजा श्रेष्ठ नेपः या निजी बैंक त नपां धिं धिं बल्ला यासे थुगु बैंक तस्कं बांलाक सेवा सुविधा बियो वयो च्वंगु व वागमती प्रदेशया हिंस्वांगुं जिल्लाय् कचा दःगु व हिंखुगु एक्सटेन्सन काउन्टर चाय्क वयागु खाँ ब्याक दिल ।

ज्या इवः सं भक्तपुर शाखाया दीपा पनेरु, शाखा प्रबन्धक विष्णु मान भैल नं न्वचु तयो द्यूगु खः ।



खुड्यागूगु खप पौ. बःछि पौ(पाक्षिक)

कोभिड लवय पानय्ता ल्यासेल्याम्हो पिनिगु ज्याया अन्तरक्रिया

भाद्र १

खप नगरपालिका वडा नं. ३ वडा कार्यालयया ग्वसालय् 'अन्तर्राष्ट्रिय युवा दिवस' या लसताय कोभिड १९ या संक्रमण व नियन्त्रणय् ल्यासे ल्याम्होपिनिगु ज्या विषयसं नेमकिपाया छ्याञ्जे नपां संघीय सांसद प्रेम सुवालया मू पाहांलय् अन्तरक्रिया ज्या इवः जुल ।

उगु ज्या इवःखय् वयकलं ल्यासे ल्याम्होपुं ह्युपा हइपुं मनूत जूगुलिं कोरोनां जनताता मथिइकः मपुंक तय्ता व इलय् हे आमूल परिवर्तन याय्ता हज्याय् मःगु खाँ ब्याकसे कोरोनाता वैज्ञानिक ढंगं ब्याख्या विश्लेषण जुयमःगुलि आध्यात्मिकता नपां स्वाडः भारतया मोदी सरकारं जनताता मखुगु लाँय् यंकगु खाँयँ कुं खिडः दिल ।

भारत नपांया खुल्ला सिमानां याडः नेपालय् कोरोना सङ्क्रमितपुं अपलं बढ्य जूगुलिं स्पष्ट याडः दिसे वयकलं देया न्ह्यलुवापिसं कपः क्वछुकसेलिं राज्य व जनतां दुःख स्युगु खाँ काडः दिल ।

भारत नपां खुल्ला सिमानां याडः नेपालय् कोरोना सङ्क्रमितपुं अपलं बढ्य जूगुलिं स्पष्ट याडः दिसे वयकलं देया न्ह्यलुवापिसं कपः क्वछुकसेलिं राज्य व जनतां दुःख स्युगु खाँ काडः दिल ।

खप नगरपालिकाया उप-प्रमुख रजनी जोशी जुं खप नगरपालिका शिक्षा, स्वास्थ्य, सम्पदालगायत हृदाय तयो जनताया सुभावा व ग्वाहाली ज्या साडः चवंगु खाँ ब्याक दिल ।



ज्या इवःसं खप नगरपालिका वडा नं. ३ या वडाध्यक्ष राजकृष्ण गोरा, वडाया दुजः कृष्ण गोपाल चौगुठी, महिला वडाया दुजः सुनिता अवाल, ने.क्रा. युवा संघया शिव सुन्दर धुख्वा नपां स्थानीय बुद्धिजीवी चन्द्रभक्त भुजुं नं न्वचु तयो द्युगु खः ।

छिकोम ब्यायाम स्यनय्गु सुरु

भाद्र १

खप नगरपालिका वडा नं. २ कार्यालयया ग्वसालय् चिनियाँ ब्यायाम छिकोड या प्रशिक्षण स्थानीय सहिद स्मृति कासा ख्यलय् मंगलबार निसँ न्ह्याकल ।

ज्या इवःसं पूर्व वडाध्यक्ष रविन्द्र खर्बुजां ब्यायाम याय्मःगु खाँ काडः दिसे तालिम बांलाक क्वचाय्मः दक सुभाय् द्यो छायो दिल ।



राजन जति जुं नेपाल मजदुर किसान पार्टी जनताता ब्यूगु व घोषणा-पत्र काथं नगरपालिकाया जनप्रतिनिधिपिसं जनताता शिक्षा, सुचुकुचु व सम्पदा म्वाकः तय्गुली हृदाय चवडः ज्या साडः चवंगु खाँ ब्याक दिल ।

भक्तपुर जिल्ला भलिबल संघया नाथो भाजु नपां भक्तपुर योङ्ग सर्कलया सल्लाहकार विनोद चरण राय जुं छिकोड ब्यायामं वैस वापुं नागरिकपिनिगु स्वास्थ्य बांलाकिगु खाँ ब्याकसे छिकोडः ब्यायाम सेनय्गु ज्या न्ह्याकगुलिं लय्ता प्वंक दिल ।

सभानायोया भाला कुबियो द्युम्हा वडा नं. २ या वडाध्यक्ष हरिप्रसाद बासुकला जुं जनताया स्वास्थ्य बांलाकय्ता खप नगरपालिकां थी थी कासा नपां छिकोड ब्यायामनं स्यनय्गु यागु खाँ ब्याक दिल ।

ज्या इवःसं छिकोड ब्यायामया प्रशिक्षकपुं नेम्हा मुना बासुकला व रविन्द्र सुवालं कासाया महत्वया खाँ ब्याकसे ब्यायाम नं याक दिल । लच्छीतक स्यनिगु उगु ज्या इवःसं खप नगरपालिका वडा नं. २ या दुजः श्याम सुन्दर मातां नं न्वचु तयो द्युगु खः ।



खुड्यागुगु खप पौ. बःखि पौ(पाक्षिक)

सल्लाधारी बस पार्क दय्के धःगुया विरोधय् खप नगरपालिकाया विज्ञप्ति



आद्र १

खप नगरपालिका वडा नं. १ खय् लागु सल्लाधारीया खुल्ला लागाय् 'बसपार्क' दय्केगु विषय खप नगरपालिका मडगलबार छगू सार्वजनिक विज्ञप्ति पिकायो असहमति प्वंकगु दः । उकिया पूर्णपाठ थथे दः-

'भक्तपुर पोष्ट डटकम' या २०७८ साउन ३० गते पिब्वगु 'खपया सल्लाधारी बसपार्क दय्के मःगु यँ महानगरया निष्कर्ष' छयौं छुडः पिथांगु बुखाँखय् खप नगरपालिकाया गम्भीर ध्यानाकर्षण जुगु दः । बुखाँसं यँ महानगरपालिका निस्वांगु यातायात सञ्चालन सम्बन्धी अध्ययन कार्यदल निस्वांगु पूर्व वानिगु सार्वजनिक सवारी साधनता जडिबुटिया लिक्कं मनोहरा खुसीया कोरिडोर वा खपया सल्लाधारी तिनकुने लाँ सिथं न्ह्याकय् मःगु ब्यहोरा नपां प्रतिवेदन दय्कगु चवयो तःगु दः । यँ महानगरपालिकाया उप-प्रमुख हरिप्रभा खड्गी श्रेष्ठया कजिलय् दय्कगु कार्यदल खपया सल्लाधारी तीनकुने लाँ सिथं अः याता धौ ख्यः पूर्वया सार्वजनिक सवारी न्ह्याकय् फै दक न्हि थाड तःगु दः । यँ महानगरपालिका लागु दुनयँ गन्तव्य तयो

वैपुं देया थी थी थासं हड्गु सवारी साधनता ब्यवस्थित याय्गु नामँ थःगु अधिकार क्षेत्र प्याहाँ वाडः खप नगरपालिका वडा नं. १ सल्लाधारी च्वंगु १०८ पि खुल्ला जग्गाय् पार्किङ्ग व्यवस्था याय्गु काथं प्रतिवेदन दय्कगु तस्कं आपतिया खाँ खः । यँ महानगरता थःगु क्षेत्राधिकार छुः खः धाय्गु थुइकेता व स्थानीय सरकारया स्वायतताया अध्ययन याय्ता नं खप नगरपालिका सचेत याय् ।

२०७८ साउन २२ गते शुक्रबारया दिनसं यँ महानगरपालिकाया उप-प्रमुख हरिप्रभा खड्गीया न्हयलुवाय् छगू प्रतिनिधिमण्डल खप नगरपालिकाया प्रमुख सुनिल प्रजापति जु नपालाय्ता भःगु खः । नपालाय्गु इवल्य् थी थी विषय नपां बुखाँखय् न्हि थाड तःगु यातायात चलेयाय्गु अध्ययन कार्य दलया विषय नं सामान्य छलफल जूगु खः । उगु इवल्य् प्रमुख प्रजापति जुं उप प्रमुख खड्गी जु नपां कार्यदलया फुक्क दुजः पिन्ता खपया सल्लाधारी च्वंगु १०८ पि जग्गा खय् खप नगरपालिका २०६० सालं निसँ खप विश्व विद्यालय निस्वाडः उकी चिकित्सा शास्त्र ब्वंकय्था लागिं छ्यलय्गु

योजना दःगु खाँ ब्याक्क कांगु खः । छलफलया इवल्य् बसपार्क थजगु अपलं ब्यस्त जुइगु संवेदनशील विषयसं फुक्क नपां क्वातुक दुय्क सल्लाह याड काथं छिगु थासय् तय्गु खाँ क्वः छिय मःगु सुभाब बियो द्यगु खः । बसपार्क लागाय् जुइगु वातावरणीय व सांस्कृतिक प्रदुषण आर्थिक व सामाजिक लिच्चः नपांया विषय दुय्कः अध्ययन जुयमः धाय्गु सुभाब ब्यगु खः । थथे नपालाडः छलफल नपां जूगु खाँखय् व खप नगरपालिकाया भौगोलिक व प्रशासनिक अधिकार क्षेत्र दुनय्या विषयलय् अनधिकृत काथं यँ महानगरपालिका निस्वांगु अध्ययन कार्यदल प्रतिवेदन पेश यागु तस्कं कुंखिय लाइकगु विषय खः । खप विश्व विद्यालय चाय्के मबिय्गु जः खः ।

खप नगरपालिकाय् २०५४ सालय् नेपाल मजदुर किसान पार्टीया जनप्रतिनिधिपुं त्याक वाडः पदवहाली यासेलिं निर्वाचन घोषणा पत्रया प्रतिवद्धता काथं २०५६ सालय् खप उच्च मा.वि., २०५८ सालय् खप कलेज व खप इञ्जिनियरिङ्ग कलेज, २०६० सालय् खप बहुप्राविधिक अध्ययन संस्थान,



खुड्यागूगु स्वप पौ. बःछि पौ(पाक्षिक)

२०६५ सालय् खवप कलेज अपन इञ्जिनियरिड व लिपा शारदा मा.वि. व शारदा क्याम्पस न्ह्याकः खवप नगरपालिकां म्हवचा धेबां भिंगु बांलागु शिक्षा बियो वयो च्वंगु खः । सर्वसाधारण जनताया काय् म्हयाय् पिन्ता च्वयथ्यंकः आखः ब्वंकय्गु उद्देश्यं निस्वांगु च्वयथा कलेजय् नेपः या मनाड छगू बाहेकं न्ह्यखुगू जिल्लाया द्वलंद्व ब्वनामिपिसं ब्वड ज्ञान कायो वानय् धुकल । अः खुडडागू जिल्लाया खुद्व स्वयो अपलं ब्वनामिपिसं ब्वडः शिक्षा कायो च्वंगु दः ।

खवप नगरपालिकां खवप दे ता ज्ञान विज्ञानया धुकु(केन्द्र) दय्केगु आजु (लक्ष्य) ज्वडः ब्वनय्कुथि व कलेजत चाय्कः वगु खः । थुगु शैक्षिक संस्थापाखं देयाता मःपुं प्राविधिक व प्रशासनिक दक्ष जनशक्ति ब्वलांक च्वंगु दः । खवप विश्व विद्यालयया विधेयक दय्कः वि.सं. २०६४ सालय् उगु विधेयक शिक्षा मन्त्रालय दर्ता यागु खः । अलय् राजनैतिक पूर्वाग्रह व पक्षपातया कारणं उगु विधेयक साहिहे लिपालाक संसदय् पेश याता । मेगु अपलं विश्व विद्यालयया विधेयक संसदय् पेश याता । २०६८ साल तकखय् खवप विश्व विद्यालयया विधेयकया बारे शिक्षा मन्त्रालय व विश्वविद्यालय अनुदान आयोगया दशवी तेलकासा म्हेतय् थें उखय् नं थुखय् थुखय् नं उखय् जक याड ई फुकल । उगु इलय् खवप नगरपालिकां शिक्षा मन्त्रालय तः क हे खापा ध्यै वांगु खः । अलय् संभाव्यता अध्ययनया लागिं संसदीय पुचः नं निस्वांगु खः । उगु पुचलं खवप विश्व विद्यालयया पूर्वाधार अध्ययन याय् धुकः स्वापु दःपुं सरोकारवालात नपां छलफल नं यात । अलय् खवप विश्व विद्यालय कय् मः छि पूर्वाधार दःगु खाँ नं

क्व छित । विधेयक सांसद पिनिगु लाहातय् लाहातय् थ्यन अलय् संसदय् औपचारिक काथं अः तक नं पेश मयानी । राज्यया पुनसंरचना नपां संघीयताया अभ्यास याय्गु इवल्य् खवप नगरपालिकां खवप विश्व विद्यालय निस्वाडः न्ह्याक देया निंतिं तस्कं महत्वपूर्ण योगदान याय्गु ज्या मदिकक न्ह्याकय्गु कुतः याडः च्वनि ।

नेपाल ट्रष्टया नामय च्वंगु उगु जग्गा खवप नगरपालिकां नेपाल ट्रष्ट नपां मिलय् जुयो थःगु हे लगानी जग्गाया चाकली पःखं मुकडः गेट नपां छुडः जग्गा त्यलय् मफय्कः संरक्षण याड वगु खः । अकिं यें महानगरपालिकां यातायात सञ्चालन सम्बन्धी अध्ययन कार्यदलपाखं खवप नगरपालिकाया सहमति मदय्कः यातायात सञ्चालन सम्बन्धी पेश यागु प्रतिवेदनता खवप नगरपालिकां गैर जिम्मेवार व स्थानीय तहया अधिकारय् क्वत्यलः कःगु खः । नेपाल ट्रष्ट नियमावली २०६५ सं ट्रष्टया सम्पति ब्वनय्कुथि, महाविद्यालय वा विश्व विद्यालय थजगु शैक्षिक संस्था व स्वास्थ्य संस्था निस्वाडः न्ह्याकय्गु व न्ह्याकय् बियगु नपां शैक्षिक लागाय् छ्यलय्ता बियगु खाँ च्वयो तःगु दः । थथे ट्रष्टया नियमं नपां शैक्षिक लागाय निंतिं छ्यलय्गु दक च्वयो तःगु उगु जग्गाखय् बसपार्क तय्गु प्रस्ताव नियमं हे मिलय् मजु । नपां खवप नगरपालिकाया भौगोलिक व प्रशासनिक कार्यक्षेत्रया सल्लाघारी लागाय् बसपार्क तय्गु यें महानगरपालिकाया कार्यदलं प्रस्ताव याय्गु धाय्गु संघीयताया मर्म, विकेन्द्रीकरणया भावना व स्थानीय स्वायत्तताया सिद्धान्तया अखः खः धाय्गु खाँ नपां ब्याकः च्वडा ।

यें महानगरपालिकां थःगु भौगोलिक क्षेत्रय् च्वंगु बसपार्कता भ्यू टावर व मेमेगु व्यवसायिक ज्याखय् छ्यलः आम्दानीया लुखाचा याडः बसपार्कत चिड्कः छ्वयो मेमेगु स्थानीय तहलय् बसपार्क तय् यंकेगु बांलागु नियत मखु । थःगु थाय्था यातायात व्यवस्था याय्गु ज्या स्थानीय तहया थः गु हे ज्या खः । स्वनिगः या यातायात व्यवस्थापन स्वनिगःया स्थानीय तहतय्गु जक मखुसँ नेपः या सरकारयाय् हे समस्या खः । थुजगु समस्या ज्यंकय्ता स्वापु दःगु फुकक पक्षत नपां ग्यसुलाक सल्लाबल्लाह याडः जक हज्याय् मः । मति मत थें जनसंख्या अप्वयो वगु व मःगु स्वयो अपः यातायातया साधनत दुता ह्यकगुलिं स्वनिगःया यातायात समस्या भन भन ग्यापुकः नियन्त्रणं पिनय् लागु खः । राजनैतिक दलया थःगु चिच्या हांगु स्वार्थ स्वनिगः भन भन अब्यवस्थित जुजुं वांगु खः । खवप नगरपालिका स्वनिगः ता सांस्कृतिक राजधानी काथं निस्वाडः स्वास्थ्य प्रशासनिक व आर्थिक नपांया ज्याइवः त देया थी थी थासय् विकेन्द्रित यायां यंकय् मःगु पक्षखय् दः । देशय् माथांक विकास याय्गु अवधारणा काथं संघीयता अझ अपः वल्लाक यंकय्ता देया फुकक भौगोलिक व प्रशासनिक लागु विकेन्द्रित याय् मः । अथेजगुलिं थुगु नं स्थानीय तहलं मेगु स्थानीय तहया क्षेत्राधिकार दुनय्था विषयलय् स्वापु दःगु स्थानीय तहया सहमती मदय्कः नुवाय्गु व छुं नं ज्यायाय् दै मखु । खवप नगरपालिकां उगु समाचार नपां स्वापु दःगु कार्यदल, कार्यदलया पदाधिकारीपुं व यें महानगरपालिकाता नपां उगु विषय ध्यानाकर्षण याय् ।

खवप नगरपालिका

**स्वप नगरपालिकाता न्ह्याबलै सफा,
सुगधर तय्गु सकल नगरवासीतय्गु कर्तव्य खः ।**



खुडच्यागूगु स्वप पौ, बःछि पौ(पाक्षिक)



हरिप्रभां खप नपाया इच्छा मदयक अप्पा छपा हे तइमखु धायो दिल

यें महानगरपालिकाया उप प्रमुख हरि प्रभा खड्गी श्रेष्ठ जुं खपया सल्लाघारी बसपार्क तय्गु विषयल्य गथे यासा जिइ दक बैकल्पिक अध्ययन जक यागु खः धायो द्यगु दः । स्वनिगः या फुक्क नगरता व्यवस्थित नगरपालिका काथं हछ्याड यंकय्ता फुक्क नपां मिल्य जुयो वानय्गु वयकलं प्रतिवद्धता नं प्वंक दिल ।

खप नगरपालिकां मंगलबार सल्लाघारी बसपार्क दयकिगु कार्यदलया प्रस्तावखय् आपति प्वकंसे यागु विरोधया सम्बन्धय् भक्तपुर पोष्ट नपां प्रतिक्रिया बियोदिसे उप प्रमुख खड्गी जुं स्व निगः या ट्राफिक व्यवस्थापन व नगर बासीपिन्ता सहजता वियता विकल्पजक क्यडागु धायोदिसे वहे छगू जक अन्तिम उपाय मखु जक धायो दिल । स्वनिगः या लकस बांलाकः, माथांकः तय्ता, अप्वयो वयो चवंगु सवारी साधनया चाप पाडः तय्ता थःगु न्ह्यलुवाया कार्यदलं विकल्प काथं जक खपया

सल्लाघारीता बसपार्क दयके फैला जक स्वयागु नपां लिपाथ्यंकया समस्या ज्यंकय्गु काथं मेमेगु थाय् नं स्वयो चवंगु खाँ नं वयकलं ब्याक दिल ।

स्वनिगल्य द्वहँ वइगु ताः ता पाकलं वइगु सवारी साधनत पूर्वया गाडी त पूर्वय हे अल्य थौक्वय्लं (थानकोतं) दुता हैगु गाडी चन्द्रागिरी नगरपालिकाय्सं अथेहे दक्षिणाकाली जुयो द्वहँ वइगु केपु नगरपालिकाय्सं तय्ता व्यवस्थित बसपार्क दयकय् फःसा फुक्कसिता अःपुइगु वयकया तर्क खः । अथेनं क्वत्यलः लाक काय्गु थः पिनिगु छुं हे मति मरुगु खाँ नं वयकं काडः दिल ।

खप नगरपालिकाया अधिकार क्षेत्रय् यें महानगरपालिकां छति हे क्वत्यल, लाकः काय्गु खाँ थमनं मनय् तक तय् मफैगु खाँ काडः दिसे वयकलं खप दे थः बुगु थाय् नं जगुलिं यें महानगरपालिकाया उप-प्रमुख हरिप्रभा खड्गी श्रेष्ठ खपया इच्छामरुगु छुं

नं ज्या मजुइगु खाँय् नं प्रतिवद्धता प्वंकः दिल ।

खप नगरपालिकाया मेयर सुनिल प्रजापति जु थः आख ब्वडाबलय् स्कूल तगिया पासा नपां जगु खाँ कुल दिसे थः नपांया कार्यदलंयाड खप नगरपालिकां दुःख प्वंकगुलिं थः तानं दुःख लगय् जगु खाँ ब्याक दिल । थःगु राजनीतिक जीवन दक मखुसँ पारिवारिक जीवन स्वयो नं चवय् थमनं खपता तयो तयागु खाँ न्हिथांसे वयकलं खपया इच्छाया अखः सल्लाघारी अपा छपा हे मतय्गु खाँ भक्तपुर पोष्ट पाखं धायोदिल । उप-प्रमुख खड्गी न्ह्यलुवाया कार्यदलं खपया सल्लाघारी बसपार्क दयकेगु विषय प्रतिवेदन पेश यागु भक्तपुर पोष्ट बुखाँ पिब्वसेलिं वहे बुखाँया लिधांसाय् मंगलबार खप नगरपालिकां थःगु गम्भीर ध्यानाकर्षण जगु खाँ पिब्वः गु खः । नपां खप नगरपालिकां यें महानगरपालिकाया कार्यदलया प्रस्तावता तहांगु आपति नं प्वंकगु खः ।

बुद्ध शरण शाही/भक्तपुर पोष्ट

‘अतिरिक्त कृयाकलाप तालिम’

खप नगरपालिकापाखं न्ह्याकः चवंगु शिशु स्याहार केन्द्रे ज्या साडः चवंगु शिक्षिका पिन्ता हिं डान्ह्या ‘अतिरिक्त कृयाकलाप तालिम’ बिल । उगु ज्याइवः खय् शिक्षिकापिन्ता किपा चवः ज्या (चित्रकला) थी थी कासा मचाम्यें त स्यंगु खः ।





खुइच्यागूगु खप पौ. बःछि पौ(पाक्षिक)

सुकुन्दा साकोसं कृषिसेवा चाय्कल

भाद्र १

खप जगाती च्वंगु सुकुन्दा बचत व ऋण सहकारी संस्थां थौं निसं कृषि सेवा वियगु ज्या न्ह्याकगु दः । खप नगरपालिकाया प्रमुख सुनिल प्रजापति जुं सुकुन्दा साकोसय् अन्नबाली, सिसाबुसा, ल्वय अन्नबालीयाकीलं वडगु समस्या थुइकः व उकिता पाड तय्ता सल्लाह सुभाब विडगु नपां प्रयोगशालाया मंगलबार छगू ज्याइवःसं उलेज्या याड दल ।

ज्या इवःसं नगरप्रमुख प्रजापति जुं अन्नबाली खय् जुइगु रोग म्हासिइकः बुई ज्यासानिपुं कृषकपिन्ता सल्लाह बियो ग्वाहाली याय्गु ज्या न्ह्याकगुलि सकल खपया जनतातय्ता बांलाइगु खाँ काडः दल ।

सहकारी संस्थापाखं न्ह्याकगु कृषि सेवा तस्कं बांलाकः ज्याखय् छ्यलिगुलि विश्वास प्वंकः दिसे वयकलं खप नगरपालिकां बांलागु जात (उन्नत जात) या वा पुसा, छो पुसा, आलुपुसा इड ब्यूगु, चा जाँचय् याय्गु, बिषादी छ्यलय्गु बारेया तालिम बियो वयो च्वंगु नपां नगरबासी ल्यासे-ल्याम्होपुं कृषक पिन्ता छ्यलय्गु काथं न्हँ काथंया बुँज्याया तालिम न्ह्याक वयो च्वंगु खाँ नं ब्याक दल ।

सरकारं बुँज्या याडः अपलं अन्न सय्के बियो, मुलुकया थःगु तुतिखय् थः हे दानय् फैगु काथं हछ्याय्मः धायो दिसे प्रमुख प्रजापति जुं भीगु देशय् हे देसी सः कारखाना चाय्केता नेपाल सरकारया ध्यानाकर्षण याड दल ।

वयकलं- बुँज्याखं किसान तय्सं थःगु किवाय् व बुई खानय् दःगु समस्या, कीलस्यंकिगु चाया गुण व थी थी खाँत न्हपालाक हे सिइकेदैगु चवछाय् बहगु ज्या खः धायोदिसे बुँज्या सानिपिन्के



सैद्धान्तिक ज्ञान म्हवँ जूगुलीं बुं म्हवचा जक अन्न सयो बुँज्याखय् ध्यान मतःगु खाँ ब्याकसें, देशां देछीया किसानतय्ता कृषि प्रविधि नपां स्वाडः यंकय् फः सा तहांगु उपलब्धी जुइगु खाँ ब्याक दल ।

ज्या इवः सं खप नगरपालिकां निस्वांगु कृषि समिति

कजि राजकृष्ण गोरं अन्नबालीखय् जुइगु रोग म्हासिइकः अमिता मः काथं सल्लाह बियगु ज्या किसान तय्गु लागिं तस्कं बांलागु खाँ खः धायो दिसे नेपः या सरकारं कृषि क्षेत्रता कमजोर याय्गु ज्या



याडः च्वंगु खाँ ब्याक दल , वयकलं कृषि सम्बन्धी परामर्श सेवा काय्गु थाय् मदयो किसानतय्सं अपलं अन्न बाली सय्के मफूगु गुकीं बुँ ज्या खय् मन क्व मसःगु खाँ ब्याक दल ।

ज्या इवः सं वडा नं. ७ या वडाध्यक्ष उकेश कवां जुं सहकारी संस्थापाखं न्ह्याकगु कृषि सेवा बारे अपलं प्रचार-प्रसार यायमःगु खाँ ब्याकसें किसानतय्ता ज्या छिनिगु काथं कृषिसेवा बांलाक न्ह्याकय् मः धायोदल । वयकलं कृषि क्षेत्रे न्हँ न्हगु प्रविधि, आधुनिकीकरण, वैज्ञानिकीकरण याय् फःसा जक भी कृषि पाखं थःगु तुतिखय् थः हे दानय् फै धायोदिसे खप नगरपालिकाया स्वीकृति मकसें चाय्कः तःगु सहकारीत खानय् दःगुलिं अनुगमन याडः च्वंगु खाँ नं काडः दल ।

कृषि विशेषज्ञ सविन ख्याजुं सुकुन्दा साकोसं स्थानीय तह खय् हे किसानय्गु समस्या ज्यंकः बियगु ज्या यागुलिं लय्ता प्वंकसे संस्थां अन्नबाली व सिसाफलय् जुइगु ल्वय, की सिइकः उकिता ज्यंकय्गु सल्लाह बियमःगु नपां उन्नत जातया पु सा नं भीथाय् दय्केमःगुलि बः बियो दल ।

ज्या इवःसं संस्थाया नायो सानुकाजी त्वानाबासु, सल्लाहकार नाति कवां व ज्या इवः न्ह्याकामि सानुकाजी चिकबञ्जार जुं नं संस्थाया उद्देश्य, सेवा सुविधा व वैगु दिनयं न्हँ न्हँगु ज्या इवः त ज्वडः हज्याय्गु खाँ नं प्वंकः दल ।



खुड्यागुगु खप पौ. बःखि पौ(पाक्षिक)

ल्यासे-ल्याम्होपुं राजनीतिक व सांस्कृतिक चेतनां ग्वाय्मः

भाद्र ४ गते अन्तरराष्ट्रिय युवा दिवसया लसताय् खप नगरपालिका वडा नं. ६ या ग्वसालय् जूगु ज्या इवःसं नेपाल मजदुर किसान पार्टीया छ्याञ्जे नपां प्रतिनिधि सभाया दुजः प्रेम सुवाल जुं ल्यासे ल्याम्होपुं व ब्वनामिपुं राजनीतिक व सांस्कृतिक चेतनां ग्वाय्मः धायो दिल ।

उगु ज्या इवः या मू पाहाँ सांसद सुवाल जुं न्हंगु पुस्तां समाजवादी बिचः कः घाडः हज्याय् मफूसा समाजय् वयो च्वंगु पंगः चिइकः हज्याय् मफैगुली पुँजीवादी बिचःत्वः त समाजवादया लाँपुई डाय्ता सल्लाह बियो दिल । वयकलं - सामन्त वर्ग जोताहा म्हेवँ, किसान तय्ता शोषण याथें सरकारय् वापुं दल व नेतातय्गु आशिर्वाद दःपुं म्यान पावर कम्पनी व शैक्षिक परामर्श केन्द्र ल्यासे-ल्याम्होपुं व ब्वनामिपिन्ता शोषण याड च्वंगु दः धायो दिल । वयकलं सरकार छ्वय्मते धायो पाडः तःगु अफगानिस्तानय् शासक दलया सुसु नेतातय्गु संरक्षणय् दःगु म्यानपावर कम्पनी नेपःया ल्यासे-ल्याम्हो पिन्ता छ्वता, उगु खाँ पिकायो दोषी पिन्ता कार्वाही याय्मः धायो दिल ।

वयकलं स्वनिगलय् मःथाय् म्वःथाय् डोजर चलेयाकः च्वंपिसं याड, छुं हे अध्ययन मयासें थः योथाय् लाँ दय्क च्वंपिसं निजी प्लटिड याक तःगुया लिचवः मेलम्ची व मनाडय् थें खुसी बःलं पाँ न्हयाड (चलं) वयो बुरय् जुयो दकलय् लीपा चोभः या गल्छी तिड स्वनिगः हकनं पुखु जुइगु ग्यापुगु ई वय फः धायोदिल ।

सांसद सुवालजुं पुँजीवादी सरकार व अमि दलाल तय्सं ल्यासेल्याम्होपिन्ता थ्वँ-ऐला त्वंकः, जुवा तास म्हेतक, कुलतय् फसय् याइगु अलय् उगु लत (बानी) त्वः तय् मफयो छँ बूँ मिइके बिइगु खाँ थुइक ! सचेत जुयो पला छियमःगु खाँ ब्याक से वयकलं खप विश्वविद्यालयया अनुमति मबिइगु मेडिकल कलेज दांकः चाय्के मबिइगु सरकार व अमिपुं नेतातय्के राणाशासनयाय् हे मति हज्याड च्वंगु खः धायो दिल ।

निर्वाचनया इलय् धेबा, सामानत इडः, भ्वयँ नकः भोतं



प्रेम सुवाल

त्याक व पिसं भुठा आश्वासन ब्यूपुं दलपिनिगु एकमना सरकार जूसां देश व जनताता भिं मयाइगु खाँ वयकलं काड दिल ।

ज्या इवःसं नेपाल क्रान्तिकारी किसान संघया केन्द्रीय उपाध्यक्ष नपां उगु वडाया दुजः गोविन्द्र दुवाल जुं म्हेगः या निरंकुश पञ्चायतया ख्यंगू इलय् नं जनताया अधिकार काय्ता ल्वापुं ल्यासे-ल्याम्होपुं हे खः धायोदिसे समाजय् ह्युपा ह्यता ल्यासे ल्याम्होपिसं थें योगदान मेपिसं याय थाकु धायोदिल ।

शिक्षक गणेशराम थुसा जुं दे हज्याय्ता ल्यासेल्याम्होपिनिगु तः हांगु लाहा दैगु खाँ ब्याकसे ल्यासे ल्याम्होपुं धुम्रपान, मध्यपान व लागु औषधया कुलतय् लाडः च्वंपुं व धेबाया नितिं न्ह्यागु नं याय्गु पुँजीवादी मानसिकतां याडः दे भन भन गालय् दुड च्वंगु खाँ काडः दिल ।

ज्या इवःया सभानायो नपां उगु वडाया वडाध्यक्ष हरिराम सुवाल जुं खप नगरपालिकाया इनापय् ल्यासे ल्याम्होपिसं कोरोना ल्वय मपुकः पाडः तय्ता यागु ज्या च्वछाय् बहज् धायो दिल ।

खप नगरपालिकाया कार्यापालिकाया दुजः रोशन मैयां सुवाल कोभिड भ्वल्वचं मपुकः तय्ता युवापिनिगु तहांगु लाहा दैगु खाँ ब्याकसे महामारीता बिचः याडः गुन्हिपुन्हि व सापास्या ज्या इवः त मः काथं जक डाय्केता इनाप याड दिल ।

ज्या इवःसं वडाया दुजः पुं सिद्धिराम अवाल व सीतादेवी नेपाली नं न्वचु तयो द्युगु खः ।

इनाप

कोरोना खः मखु परीक्षणया लागिं स्वाब नमूना ब्यूपुं सकल दाजुकिजा तताकेहँ पुं नेजेटिम रिपोर्ट पास भवतलय् छँ सं च्वड दियता इनाप याड च्वडा । कोरोनां थः नं सुरक्षित जुय, मेपिन्ता नं सुरक्षित याय् ।

खप नगरपालिका, खप



खुड्यागूगु खप पौ. बःखि पौ(पाक्षिक)

सत्ता केन्द्रीत राजनीति जनताता दुःख

भाद्र ८

सुरेन्द्र राज गोसाईं

खप नगरपालिका वडा नं. ४ या ग्वसाल् जूगु अन्तर्राष्ट्रिय युवा दिवसया लसताय् कोभिड १९ भ्वल्वचं मथिइकः तय्ता ल्यासे ल्याम्होपिनिगु भूमिका विषय ज्या इवःसं नेमकिपाया केन्द्रीय दुजः नपां वागमती प्रदेशया सांसद सुरेन्द्र राज गोसाईं जुं शासक दलपिसं खाली सत्ता सत्ताजक हालः सत्ता केन्द्रीत राजनीति याडः चवंगुलि देश व जनतां दुःख स्यूगु खाँ काडः दिल ।

तः कः प्रधानमन्त्री जुयानं जनताया निंति सिन्का छपु हे त्वः थुल्य मफुपुं पाखं जनताया भिं मजुइगु खाँ ब्याकसे कोभिड १९ ल्वचं मपुकः पाडः तय्ता याक्वा बाक्वा जुयो मफैगुलिं सकलें मिलय् जुयो कुतः याय्मः धायो दिल ।

हलिमयया अपलं देशता जलाखाला दे चीनं खोप ब्यूगु व खबौं तका याय् ति स्वास्थ्य सामग्री इडः ब्यूगु तथ्य प्रस्तुत यासे वयकलं अमेरिकी साम्राज्यवादं क्यूवाता याडः चवंगु नाकाबन्दी खुइदा स्वयो ता हाकः अमानवीय काथं याडः तगु तुरुन्त लिकाय मः धायो दिल ।

खप नगरपालिकाया उपमेयर रजनी जोशी जुं सल्लाघारीया १०८ पी जग्गा जनतायाय्गु हे खः । अः नेपाल टृष्टया नामयँ तयो तःगु उगु थासय् खप नगरपालिकां खप विश्वविद्यालय व मेडिकल

कलेज दय्केगु प्रस्तावता सरकारं बेवास्ता याडः चवंगुली आपति प्वंकसे उगु जग्गा शिक्षा, स्वास्थ्यया लागिं छ्यलय् फैगु टृष्टया नियमावलीखय् चवयो तःसां यँ महानगरपालिकां बसपार्क दय्केमःगु खाँ न्हि थांगु जनभावनाया अखः खः धायो दिल ।

वयकलं जनताया अपलं मायां खप नगरपालिकां खप अस्पतालय् अक्सिजन प्लान्ट तयो धेबा मकसिं सिंतिं अक्सिजन इड नगरबासीपिनिगु सेवा याडः वयागु खाँ ब्याकदिल ।

नेमकिपा भक्तपुर नगरसमितिया दुजः उपेन्द्र सुवाल जुं देया सच्चिखय् न्हयःब्वः ल्यासे-ल्याम्होपुं विदेशय् तस्कं ग्यापुथाय् ज्यान पाडः ज्या साडः चवंगु नपां न्हि या न्हिथं ल्यासे ल्याम्होपिनिगु लाश दुकायो चवंगु धात्थें गु खाँ काडः दिसे साम्राज्यावादी शक्ति व विदेशी दलाल पिनि पाखं देया सार्वभौमिकता ल्यंकः तय्ता ल्यासे-ल्याम्होपुं छप्पा जुयो खाँ थुइकः हज्याय्मः धायोदिल ।

खप नगरपालिका वडा नं. ४ या वडाध्यक्ष कुमार चवालया सभानायोलय् जूगु उगु ज्या इवःसः नेमकिपा लाकुलाछँ इकाइया नायो भाजु न्हुछे राम भेले, नगर कार्यपालिकाया दुजः कृष्ण लक्ष्मी दुवाल, वडाया दुज पुं पशुपति प्रजापति, राजेन्द्र माक पिसं नं न्वचु तयो द्यूगु खः ।

अन्तरराष्ट्रिय युवादिवसया लसताय प्रवचन

भाद्र ३

खप नगरपालिकाया प्रमुख सुनिल प्रजापति जुं खप वडा नं. १ य चवंगु सल्लाघारीया नेपाल टृष्टया नामय् चवंगु १०८ पि जग्गा शैक्षिक क्षेत्रया लागिं छ्यलय्गु नियमय् व्यवस्था याडः तःकाथं खप विश्वविद्यालय निस्वाडः उकी हे चिकित्सा शास्त्र ब्वंक्यगुलि छ्यलय्गु खाँ खप नगरपालिका वडा नं. १० या ज्या इवः सं धायो दिल ।

अन्तर्राष्ट्रिय युवा दिवसया लसताय् जूगु ज्या इवःसं वयकलं नेपाल टृष्ट नपां मिलय् जुयो उगु जग्गाया चाकली पखं मुइकः प्यखेरं गेट तयो मेपिसं त्यल काय मफ्युकः संरक्षण याडः तयागु खाँ नं काडः दिल ।

नेपः या बां बां लापुं डाक्टर इञ्जिनियर, नर्स बैज्ञानिक सः स्यू थुपुं विशेषज्ञपुं विदेशय् वाडः चवंगु खाँ ब्याकसे वयकपिनिगु जनशक्तिभ्रीगु देशय् छ्यलय् मफयो दे हज्याय्ता थाक्यो चवंगु खाँ ब्याकसे वयकलं हःनय् वयो चवंगु सापारु नखाता कोभिड ल्वय डाडः पुडः मवानिगु काथं डाय्केता खप नगरपालिकां नगरबासीपिन्ता कोभिड भ्वल्वया खाँ काँ कां सचेत यायां वयो चवंगु, न्हिया न्हिथं माइकिड याडः चवंगु, कोभिडया खोप बियता ब्यवस्थित काथं ज्या याडः वयो चवंगु नं खाँ ब्याक दिल ।

वयकलं ल्यासे ल्याम्होया (शक्ति) बः खःगु थासय् छ्यलय् फःसा दे मथां विकास याय् फैगु खाँ ब्याकसे अमिता विकृति विसंगतिं तापाक्क तय्मःगु सल्लाह नं बियो दिल ।

ज्या इवःसं वागमती प्रदेशया सभासद सृजना सैजुं जलाखाला दे चीनया ल्यासे ल्याम्होपिसं जनताया सेवा निस्वार्थ रुपं याय्मः धाय्गु खाँ थुइक वेहे लाँपु ज्वडः जीवन हज्यासेलिं चीन थौं हलिमय् अपलं हज्याय फःगु खाँ ब्याकसे वयकलं युवा भावना म्वाकः तय्मः धायोदिल ।

ल्यासे ल्याम्होपिन्ता शिक्षानपां राजनैतिक चेतनानं बियमगु खाँ काडःदिसे वयकलं कोरोना भ्वल्वचं मपुकः पाडः तय्ता खपनगरपालिकां याडः वयो चवंगु ज्या तस्कं च्छाय् बहजु धायोदिल । एमसीसी अमेरिकी साम्राज्यवादं चाकुं इल तःगु विष हवलः तःगु खः धायोदिसे सांसद सैजुं एमसीसीया विरुद्ध सकल युवा, विद्यार्थी महिला नपां सकल जनसमूदायता सचेत यायां यंकय् मः धायोदिल ।

नेपाल मजदुर किसान पार्टी भक्तपुर नगरसमितिया नायो भाजु नारायण बहादुर दुवाल जुं अमेरिकी साम्राज्यवादं बमलागु देतय्ता न्हुतुमतु न्हयो क्वत्यलः छोइगु खाँ थुइकः ल्यासेल्याम्होपुं सचेत जुयमःगु खाँ काडः दिसे ल्यासे ल्याम्होया जनशक्तिता राजनैतिक रुपं सचेत याय् फःसा देया ख्वः मथां हिलिगु खाँ ब्याक दिल ।

ज्या इवःसं ज्याइवःया सभानायो नपां खप नगरपालिका वडा नं. १० या वडाध्यक्ष लक्ष्मी प्रसाद ह्योमिखा, वडाया दुजःजितेन्द्र मुनंकमिपिसं हःनय वयो चवंगु सापारु पर्व सुरक्षित व मर्यादित काथं डाय्के मः धाधां वडां छँ छँ वाडः चव्युकः चवंगु खाँ ब्याक दिल ।



खुड्यागुगु खप पौ. बःखि पौ(पाक्षिक)

अन्तर्राष्ट्रिय युवा दिवसया ज्या इवः

भदौ १



अन्तर्राष्ट्रिय युवा दिवसया लसताय खप नगरपालिका वडा नं. ९ या ग्वसालय् कोभिड संक्रमणया इलय् मपुंकः पाडः तय्ता ल्यासे ल्याम्होपनिगु भूमिका व समसामयिक विषयसं प्रवचन ज्या इवः मंगलबार क्वचाल ।

ज्या इवःसं खप नगरपालिकाया प्रमुख सुनिल प्रजापति जुं क्वहयंगु व प्रतिगामी बिचः ज्वडः जुडपुं न्ह्यागुनं उमेर समूहया मनूत युवा धाय् फै मखु धायो दिसे समाजता हछ्याय्गु, प्रगतिशील व क्रान्तिकारी विचार धाराया न्ह्यागुनं उमेर समूहया मनू तय्ता युवाकाथं म्हासिडका पिब्वयमःगु लि बः बियो दिल ।

देया भविष्य ल्यासे-ल्याम्होपनिगु शक्तिखय् लाइगुलिं थः कय् दःगु ज्ञान, अध्ययन योग्यता व क्षमता विकास याय्ता ल्यासे ल्याम्होपुं हज्याय मः धायोदिल । कोभिड ल्वय मपुंकः मपांकः तय्ता समाजवादी देशया अनुभवया खाँ काड दिसे खप नगरपालिकां म्हावचा इलय् हे जनताया ग्वाहालीं अक्सिजन प्लान्ट निस्वाडः सर्वसाधारण जनताता धेबा म्वायकः इडः च्वंगु खाँ काड दिल ।

ल्यासे ल्याम्हो पिसं राजनीतिक खाँ थुडक वर्गीय राजनीतिखय् सक्रिय जुयमः गु खाँ ब्याकसे वयकलं गुल्बलेतक ल्यासे-ल्याम्हो पिन्के थःगु हे देशय् च्वड देता थः मनं माया याडः, थःगु हे देशय् च्वडः देता थःगु तुतिखं चुय फय्कय्गु ज्यायाय्गु लि

बिचः याय् मः, अथे याय् मफूतलय् देश विकास याडः तः मि याय् फै मखु धायोदिल ।

ज्या इवः सं सभापति नपां खप नगरपालिकाया वडा नं. ९ या वडाध्यक्ष रविन्द्र ज्याख्व जुं खप नगरपालिकाय् अ.४५६९ म्हा मनूत कोभिड ल्वचं थियो उथि उथि काड च्वंगु दःधायोदिसे खप नगरपालिकाया आइसोलेसन केन्त्रे ३७ म्हा सिनं स्वास्थ्य लाभ याड च्वंगु खाँ ब्याक दिल । वयकलं कोरोना विरुद्धया लडाइँखय खप नगरपालिकां कोभिड विरुद्धया खोप अभियान सशक्त व व्यवस्थित काथं न्ह्याकय्गु खायँ बः बियो दिसे हःनय वयो च्वंगु सापारु पर्वता मर्यादित व्यवस्थित व सुरक्षित ढंगं डाय्केता इनाप याडः दिल ।

नेमकिपा दतात्रय एकाइ समितिया नायो भाजु सञ्जय मानन्धरं कोभिड संक्रमण जोखिमया कारणं अपलं मनूतय्सं शारीरिक व मानसिक पीडा नयमःगु खाँ ब्याकसे कोरोना महामारी मपुंकः पाडः तय्ता खप नगरपालिका व नगरपालिकाया जनप्रतिनिधिपिसं यागु ज्या च्वछाय बहजू धायो दिल ।

खपया प्रहरी नायव उपरीक्षक पञ्चकुमार बाखुं समाज्य शान्ति, सुरक्षा सुब्यवस्था याडः तय्ता नपां अपराध अनुसन्धान व नियन्त्रण याय्ता प्रहरी व समाजया स्वापु तस्क बांलाय् मःगु बिचः प्वंकः दिल ।

भीगु नगर सफा नगर, सफाइ भीगु गौरव



खुड्यागूगु स्वप पौ. बःछि पौ(पाक्षिक)

सापारु मःकाथं जक डाय्केगु निर्णय

भाद्र २

खप नगरपालिकाया प्रमुख सुनिल प्रजापतिया नायोसुई 'गाईजात्रा २०७८' सामान्यकाथं मः काथं जक डाय्केता जात्रा नपां स्वापु द पुं नपां बैठक चवन ।

सापारु बारे हलिमय ब्याकः महामारीकाथं डाडः पुडः वयो चवंगु कोभिड १९ खप देशय नं न्हिया न्हिथं अपलं खानय दयो वयो चवंगु नपां स्वनिगः या जिल्ला प्रशासन कार्यालयं २०७८ भदौ ८ गते चान्हयसिया १२:०० ता इलय तक खुला काथं सभा, सम्मेलन जात्रा, भवय डाय्केगु मयायता निषेधाज्ञा नपां जारी याड तःगु अवस्थाय थुगुसीया गुन्हिपुन्ही (जनै पुर्णिमा) व सापारु (गाईजात्रा) मः काथं सामान्य औपचारिकता जक पुरे याड डाय्केता नपां घिन्ताड घिसी व सांस्कृतिक ज्या इवः तः पिमकायता अलय सीम्हा मनूया लुमन्ति यंकिगु ताहासाँ दे चाहिडकेगु इलय छगू पुचलय नीम्हा स्वयो अपः मन् मवयता स्वापु दःपुं, सीगु छँ जः पुं, दाफाः, भजन सांस्कृतिक पुचः बाजा खलः फुक्कसिता इनाप यायगु निपं यात ।

बैठकसं न्वचु तयो दिसे नगर प्रमुख प्रजापति जुं कोभिड जोखिमं याडः हःनय वयो चवंगु सापारु व गुन्हिपुन्हीता शान्तिपूर्ण व सुरक्षित काथं औपचारिकता जक पू वांकः डाय्केता स्वापु दःपुं पक्ष, वडावडाया सांस्कृतिक गुरुपुं नपां सांस्कृतिक प्रतिनिधिपुं नपां छसिकाथं मुंकः छलफल याडागु खाँ ब्याक दिल ।

कोभिडं मपुंकः चवनयगु उपाय धायगु हे खोप अभियानता तस्क बांलाकः फुक्कसिता याकयगु जगुलिं खप नगरपालिकां नगरया फुक्क वडाय व्यवस्थित ढंगं खोप अभियान न्ह्याकः चवंगु खाँ ब्याक दिल । नपां जनताता कोभिड ल्वयया बारे सचेतना ग्वाकयता न्हिया न्हिथं माइकिड, सापारु बलय साँ चाहिडकेगु लाँपुई पांकः तःगु सामानत चिडकेता व सापारु खुनुं हुलमुल मजुडगु काथं पर्व डाय्केता जनताता इनाप याडागु खाँ वयकलं काड दिल ।

खप नगरपालिकां समाजता कोभिड संक्रमण मजुडकेता कुतः याडः चवंगु खाँ ब्याकसे प्रमुख प्रजापति जुं थःगु स्वास्थ्यता

सुरक्षाया नितिं जनता थः मनं हे थुडकः जुयमः धायोदिल ।

बैठकय खपया प्रहरी उपरीक्षक शिवकुमार श्रेष्ठ जनताया जीवन रक्षा हे न्हांगु ज्या खः धायोदिसे कोभिड महामारीया हुनिं हः नय वयो चवंगु सापारु बलय हुलमुल मयासँ औपचारिकता जक पुरय याडः डाय्केता बः याड दिल । नगरया थी थी थासय हेल्थ डेस्क चाय्कागु, अडियो भिडियो पाखं सचेतना ग्वाकयगु, जुयफगु अपराधता बिचः याड मजुडकेता व्यवस्था यायगु नपां ट्राफिक व्यवस्थापनया पुचः चाहिडकेगु थजगु विषयता हदाय तयो ज्या साडः चवडागु खाँ वयकलं काड दिल ।

गुठी संस्थान कार्यालय खपया प्रमुख आनन्द प्रसाद कर्माचार्य जुं भीगु संस्कृति स्वाकः तयता जात्राता मः काथं जक डाय्के मःगु खाँ ब्याक दिल । बैठकय खप अस्पतालया रत्न सुन्दर लासिवा, काठमाडौं उपत्यका खानेपानी लि., नेपाल विद्युत प्राधिकरण, केबुल नेटवर्कया प्रतिनिधि नपां मेमेगु निकायतयसं जात्रा न्ह्याडः चवंतलय स्वास्थ्य सुरक्षा मापदण्ड पालना याड त्वनयगु नाः या व्यवस्था याडः मता मस्यासीं अव्यवस्थित केबुल तारत व्यवस्थित याडः तयगु थः थः गु जिम्मेवारी काथं ज्या पुवांकयगु बचं बियो दिल ।

स्वापु दःपुं नपां चवंगु बैठक सापारु खुनुं खप नगरपालिकां देचाहिलिगु लायं थाय थासय प्राथमिक स्वास्थ्य उपचार केन्द्रया व्यवस्था, निर्माण सामग्री नपां मेमेगु सामग्रीत थासय लाकय बियगु, माक्स, स्यानिटाइजरया व्यवस्था यायगु । साभूथाड लाहा सिडकेगु, सुचुकुचु नपां जनताता थुडके बियता प्रचार-प्रसार माइकिड्यायगु खाँ क्वः जित ।

गुन्हिपुन्ही व सापारुया इलय मः काथंया शान्ति सुरक्षाया फुक्क जिम्मा जिल्ला प्रशासन कार्यालय व महानगरीय प्रहरी परिसरं अव्यवस्थित तार व केबुलत नेपाल विद्युत प्राधिकरण, नेपाल टेलिकम नपांया स्वापु दःगु सेवा प्रदायकं २०७८ भाद्र ५ गते दुनय मिलय यायगु खाँ क्वः जित ।





खुड्यागुगु खप पौ. ब:खि पौ(पाक्षिक)

भक्तपुर काण्डःपञ्चायती फासीवादया सिलसिला खः

नेपाल मजदुर किसान पार्टीया छ्याञ्जे नपां संघीय सांसद प्रेम सुवालजुं नेमकिपा विरुद्ध पञ्चायती राज्य स्तरया नेता त व पञ्चतयसं यागु अत्याचारया खाँ न्हूगु पुस्ताता काडःथुडकय बियता अलय राजनीति महिता मिखालं स्वयो न्हूयो छ्वइगु ज्या अः नयाय् फःनि धाय्गु खाँ ग्वाकयता दायँ दायँ पतिकं भक्तपुर काण्डया विरोध व कुँखियगु ज्या याडः वगु खाँ काड दिल् ।

२०४६ सालया जन आन्दोलनय् ज्यान पाड सहादत प्राप्त याड द्यपुं सहिद पिनिगु योगदान च्छाय बहःजू धायोदिसे सांसद सुवाल जुं भक्तपुर काण्डं शत्रु व मित्र म्हासिडकय दःगु खाँ भदौ ११ गते नगरपालिकाया ग्वसालय जूगु ज्याभ्वः सं ब्याक दिल् ।

राजनीतिक दलं गुळे तक थःपुं कार्यकर्तापिन्ता बिचः व सिद्धान्तं ग्वाकः अनुशासित याय फैमखु उल्लेतक देशय् भ्रष्टाचार मदयके फै मखु धायोदिसे वयकलं कार्यकर्ता संकटया इलय बिसे मवासीं उकिया विरुद्धय् ल्वाड हज्यायगु बचं बियमः धायोदिल् । निर्वाचन आयोगता स्वायत्त, निष्पक्ष व स्वतन्त्र यायमःगु खाँ काड दिसे सांसद सुवाल जुं विदेशीकय लाहाफयो निर्वाचन आयोगया सफ्टवेयर द्यकेगु मखुगु लाँपुई डःगु खाँ काड दिल् ।

ज्या भ्वःसं खप नगरपालिकाया प्रमुख सुनिल प्रजापति जु पूँजीपतितयसं शासन सत्ता लाहातय् लाकयता न्ह्याथिन्योगु अनैतिक व ग्यापुगु ज्यायायता नं लिफः स्वइमखु धायोदिसे लकामँः जक क्वखायक चाहिडकः, सामान्य कुटपिटजक याम्हा मनुता सीत जक धायो घोषणा याडः 'भक्तपुर काण्ड' या लाखे प्याखं ल्हूगु घटना कुलदिसे- 'गना दमन जुई आना प्रतिरोध जुई' धायथें भक्तपुर काण्डया इलय यागु अत्याचारं देशां देछीया जनतां विरोध याय्गु छगू तागत ब्यगु, जः जि जक याड, थःगु सत्ता ल्यंकः तयता जूपुं थःहे म्हाया गालय दुंगु खाँ काड दिल् । नपां प्रतिक्रियावादी संघ संस्थाय् द्वहँ वाड जनताया सेवा याय्गु नीतिकाथं नेमकिपां क्रान्तिकारी संसदवाद काथं छ्यलः ज्या याडः वयोचवंगु खाँ ब्याकसँ प्रमुख प्रजापति जुं संसदय् जनविरोधी कानून पारित याकय मबियता, जनता या पक्ष न्हँ न्हँगु कानून दयके बियता

नेमकिपां संघ व प्रदेशता छ्यलः चवंगु खाँ काड दिल् ।

सत्ताया लागिं शासक वर्ग खपया पुयो अनेक ज्यायाय् फःगु, नेमकिपाता स्थकयता अनेक जः याडः बलं क्वत्यलय् योगु, नपां २०४५ सालया 'भक्तपुर काण्ड' थजगु हकनं-हकनं याय्फःगुलिं सचेत याड दिल् ।

खप नगरपालिकाया उप-प्रमुख रजनी जोशीं राज्यस्तरं नेमकिपाता हाँगःलिसें लिडः छ्वय्गु मतिं यागु जः सफल मजगु खाँ ब्याकसे नेमकिपा सिद्धान्त व बिचः लय् अडिग पार्टीखः धायो दिल् ।

'भक्तपुर काण्ड' हकनं-हकनं जुय फःगु खाँ खय् सचेत यासे नेमकिपाया जनप्रतिनिधिपुं, कार्यकर्तापुं व कर्मचारीपुं सचेत जुयो हज्याडः जनताया सेवा याय्मः धायोदिल् ।

ज्या भ्वःसं खप नगरपालिका वडा नं. ६ या वडाया दुजः गोविन्द दुवाल जुं पञ्चायती राज्य आतडकं यागु अत्याचारया खाँ कुल दिसे भक्तपुर काण्डया इलय नेमकिपाया पक्षखय् वकालत याडः द्यपुं न्यायप्रेमी जनता, बुद्धिजीवी, व सञ्चार माध्यमया पासापिन्ता सुभाय् देछायो दिल् ।

खप नगरपालिका वडा नं. ७ या वडाध्यक्ष उकेश कवां जुं थःगु जेल जीवनया खाँ कुल दिसे 'भक्तपुर काण्ड' नेमकिपाया बिचः व सिद्धान्तकाथं ज्या साडः चवंगु खाडः, ग्याडः यागु जःखः धायोदिल् ।

खप नगरपालिका कार्यपालिकाया दुजः रोशन मैयाँ सुवालं भक्तपुर काण्डया इलय मिसामस्तयसं यागु च्छाय बहगु ज्या कुलदिसे पञ्चायती व्यवस्था लिडः छ्वयता खपया मिसा मस्तयगु नं तः हांगु लाहादः धायोदिल् ।

ज्याभ्वःसं नेपाल नगरपालिका कर्मचारी एशोसियसन खपया नाथो भाजु गौतम प्रसाद लासिव जुं भक्तपुर काण्डया इलय निरंकुश पञ्चायती व्यवस्थां खप नगरपालिकाया कर्मचारी पिन्ता यागु अत्याचारया खाँ काड दिल् ।

ज्या भ्वःसं खप नगरपालिकाया प्रमुख प्रशासकीय अधिकृत रामलाल श्रेष्ठ व खप नगरपालिका वडा नं. २ या वडाध्यक्ष हरिप्रसाद बासुकलाजुं नं न्वचु तयो द्यगु खः ।

लच्छीया सांकेतिक भायया तालिम क्वचाल

आद्र ३

खप नगरपालिकाया ग्वसालय् जूगु लच्छीया सांकेतिक भायया तालिम बिहिवार क्वचाल । खप नगरपालिकाया उप-प्रमुख रजनी जोशीया मू पाहाँलय् जूगु उगू ज्या इवसं ब्वति कःपुं सकल सिता वयकलं दसि-पौ लः ल्हाडः दिल् ।





खुड्यागूगु खप पौ. बःछि पौ(पाक्षिक)

वडा नं. ३ या न्हूगु भवन उलेज्या

अठौ १२

खप नगरपालिकाया प्रमुख सुनिल प्रजापति जुं खप नगरपालिका वडा नं. ३ वंशगोपालय च्वंगु वडा कार्यालयया न्हूगु वडा कार्यालय भवन आइतबार उलेज्या याडु दिल ।

स्वतात्या जःगु वडा कार्यालय भवनया उलेज्या यासे नगर प्रमुख प्रजापति जुं २०७५ मंसिर २८ गते निस्वांगु उगु भवन २०७७ मंसिर २८ गते निर्माण सम्पन्न जूगु खः ।



ज्या इवःसं नगर प्रमुख प्रजापति जुं वडा कार्यालय व्यवस्थित मजुतल्य वडा तह्या कार्यसम्पादन व्यवस्थित जुय मफैगु खाँ ब्याकसे न्हूगु वडा कार्यालय भवन सेवा ग्राहीपिसं अःपुक सेवा काय फैगु व भवनता बांलाक छ्यलिगु विश्वास प्वंकः दिल ।

जनप्रतिनिधिपुं जनताया सेवक खः । वयकलं-खप नगरपालिकाया जनप्रतिनिधिपुं जनकेन्द्रित जूयो समर्पित जुयो ज्या साडु वयो च्वंगु दः जनताता मःमगुलि ग्वाहाली याय्ता जनप्रतिनिधिपुं न्ह्याब्लें तयार दः धायो दिल ।

खप नगरपालिकां उपभोक्ता समितिपाखं विकास निर्माणया ज्यात हछ्याडः च्वंगुया मू उद्देश्य आर्थिक पारदर्शिता, स्थानीय जनताया थःधायगु भावना ब्वलांकः भिंकः, बांलाकः दानयगु ज्या याडुः च्वंगु खाँ ब्याकसे वयकलं खपया जनता छप्पा छुधि जूयो थः भः पियो ज्या सांगुलिं थौं या यचु -पिचुगु बांलागु खप दे दःगु खाँ ब्याक दिल ।

खप नगरपालिका वडा नं. ३ या वडाध्यक्ष राजकृष्ण गोरं साविक वडा नं. १३ व १६ नेगू वडाता पायक जू थाय् वडाया

न्हूगु भवन दांगु खाँ ब्याकसे भवन दानय्ता उपभोक्ता समिति व वडाबासीपिनिगु ग्वाहाली व समन्वयया कारणं इलय् हे दानय् धुंगु खाँ ब्याक दिल ।

भवन निर्माण उपभोक्ता समितिया नायो समाज सेवी राम सुन्दर खाताखो नं खपया जनतात नगरपालिकाया छगू छगू ज्या इवः, थःगू भः पियो ग्वाहाली भावं हज्याड च्वंगु खाँ ब्याकसे वडा कार्यालयया

भवन दानय्ता खानय् दय्क-मदय्क ग्वाहाली यापुं सकलसिता सुभाय देछायो दिल ।

साविक वडा नं. १३ या पुलांम्हा वडाध्यक्ष राम हरि गोरा जुं वडा कार्यालयया भवन दानय्ता काथं छिंगु थाय् मरुगुलिं वडा भवन दानय्गु लिपा लाडु च्वंगु खाँ ब्याकसे अः याय्गु भवन लगत इस्टिमेट स्वयो म्हुवचा धेवां जाय्कय् दःगु बांलागु खाँ खः धायो दिल ।

ज्या इवःसं खप नगरपालिका वडा नं. १६ या पूर्व वडाध्यक्ष इन्द्रमान श्रेष्ठ भवन निर्माण अनुगमन समितिया कजि मुक्तिराम स्वानेपा, उपभोक्ता समितिया दुजः मैयाँ ध्वंजु व उपभोक्ता समितिया शिवराम धुख्व जुं नं वडा कार्यालय भवन दय्केगुलि सकलसिया ग्वाहाली दःगु खाँ ब्याक दिल ।

ज्या इवःसं उपभोक्ता समितिया दां भारी लक्ष्मी प्रसाद गोरं वडाकार्यालय भवन इलय् हे दानय् धुंगु व भवनया लगत इस्टिमेट २ करोड ७३ लाख हिस्वद्व व गुस व हिप्पका दःगुलि मुक्कं खर्च १ करोड ७२ लाख डयस्वद्व व स्वस व डयस्वर्का बांगु खाँ काडु दिल ।

बहिरा संघया नीडाकगु साधारण सभा

खप नगरपालिकाया प्रमुख सुनिल प्रजापतिया मू पाहाँलय जूगु बहिरा संघया नीडाकगु वार्षिक साधारण सभा सं संस्थापक पदाधिकारी जू पिन्ता दोसल्ला डय्कः भाद्र १२ गते व्वचाय्कल ।

ज्या इवःसं प्रमुख प्रजापति जुं योग्यता व क्षमता दःपु न्ह्याथाय् सफल जुडुगु खाँ ब्याकसे खप नगरपालिकां ल्यासेल्याम्होपिन्ता लाहातय् ज्या दैगु तालिम बियो वयो च्वंगु खाँ ब्याक दिल ।

वयकं अपाङ्गता जूपिन्ता अपाङ्ग मैत्री सामग्री इडु बियागु, अपाङ्ग मैत्री कासाया धिं धिं बल्ला याडु वयो च्वडागु नपां लच्छिया सांकेतिक भाय्या तालिम बियागु खाँ ब्याकसे खप नगर

क्षेत्र दुनय दय्कगु सरकारी कार्यालय, सम्पदा लागा व पुखुली अपाङ्ग मैत्री काथं दय्कगु नपां सांकेतिक भाय्या तालिम मब्यूसें मगागु खाँ ब्याक दिल ।

संघया नायो जयराम पक्का नेवारं संघयाडः वगू ज्याइवः त काडुः दिल । राष्ट्रिय अपाङ्ग महासंघ नेपालया केन्द्रीय दुजः सत्यदेवी वाग्ले जुं सांकेतिक दोभाषे नपां अपाङ्गता जू पिन्ता ज्या बियमः धायो दिसें गैसस महासंघया छयाञ्जे रमेश गिरी, संघया छयाञ्जे टीकाराम लामिछाने संस्थापक नायो भाजु नकुल प्रसाद अधिकारी, वागीश्वरी मा.वि.या प्र.अ. कृष्ण प्रसाद धन्छा लगायतया संघया पदाधिकारीपिसं नुगः खाँ तयो द्यगु खः ।



खुडच्यागूगु स्वप पौ. बःखि पौ(पाक्षिक)

बजार अनुगमन

खप नगरपालिका बजार अनुगमन पुचः या कजि राजकृष्ण गोराया न्ह्यलुवाय् जगाती व कमल विनायक आवास क्षेत्रय् बजार अनुगमन यात । जगाती हिगु पसः अनुगमन याबल्य दर्ता मयागु च्यागु पसः आना हे दर्ता याकल ।

अनुगमनया इवल्य दाजुभाइ मिटशप, आइसा लेडिज टेलर्स, सम्पूर्ण मोटर साइकल वर्क्सशप, असली टेलरिड सेन्टर, भक्तपुर स्वास्थ्य क्लिनिक, निर्मला जनरल स्टोर, जगाती स्टोर सबिना तरकारी पसः दर्ता याकगु खाँ निरीक्षक रामकृष्ण प्रजापतिं धायो दिल ।

अनुगमनया इवल्य जयगुरु गणेश मसला पसल्य म्यादफूग सामानत जम्बो कोक छगः, जम्बो स्प्राइट छगः, धू याड बिल अथेहे जगाती स्टोरय् म्याद फूग सामानत करी पाउडर मसला हिगु पाकेट, वेगन नेगः जफतयाडधू यातसा पुनम खाजा घरय् म्याद फूग जम्बो कोक छगः धू याड बिल ।

अथेहे कमल विनायक आवास क्षेत्रय् हिछगू पसल्य अनुगमन याबल्य अपलं पसः दर्ता मयागुलिं आनाहे दर्ता याकला अनुगमनय शुभलक्ष्मी तरकारी पसः, आयुष नेवारी खाजा घर, अञ्जना मोटर साइकल वर्क्ससप, प्रतिभा हेयर कटिङ् शैलुन, सुजिता वासिङ् सेन्टर, श्री गणेश किराना स्टोर दर्ता याकगु खाँ वडा निरीक्षक रामकृष्ण प्रजापतिं काड दिल ।

अथेहे काभ्रे गणेश डेरी दर्ता प्रमाण पत्र क्यनय् मफूगुलिं

खप नगरपालिका दुनयँया सहकारी अनुगमन

साउन ३२

नेपः या थी थी थासय् चाय्कः तःगु सहकारी संस्थाया सञ्चालकपिसं धेबा प्वः चिडः बिसे वांगु न्हिया न्हियं बुखाँ पिब्वयो च्वंगु दः । थुगु खाँयाता बिचः याडः खप नगरपालिकां खप नगरपालिका दुनयँ चाय्कः तःगु थी थी सहकारी संस्थात अनुगमन याय्गु ज्या न्ह्याकगु दः ।

सोमबार यागु अनुगमनया इवल्य खप नगरपालिका वडा नं. ५ आदर्श बस स्टपय् च्वंगु सन्तति विकास बचत व ऋण सहकारी संस्था लि.सं अनुगमन बारे हिसाब-किताब नपां नगरपालिकाय् वयता अनुगमन पुचः निर्देशन बिल ।

अथेहे खप नगरपालिका वडा नं. ४ गपली च्वंगु नेप्कुन कार्यालय सं अनुगमन याबल्य केन्द्रीय कार्यालयया वार्षिक ज्याइवः जूगुलिं कार्यालय तिडः तःगु जानकारी वगु जुल । ४ वडा गःपलि हे च्वंगु पान बचत व ऋण सहकारी संस्था लि सं वांगु दायँ अनुगमनया इवल्य खानय् दःगु कैफियतत गुलि सुधारय् जूला उकिया फाइल अध्ययन याडः हकनं सुधार यायमःगु कैफियतत स्वलाया दुनयँ सुधार याय्गु संस्थाया व्यवस्थापक जानकारी ब्यूगु दः ।

ज्वड नगरपालिकाय् वयमःगु सृजना तामाडुया पस दर्ता मयासँ च्वंगुलिं तालाजु छजु जफत यागु, अथेहे प्रजापति स्टोरय् म्याद फूगु मिरिण्डा धू याड बिल । अथेहे सिद्धि गणेश किराना पसल्य दर्ता याय् मःगु व म्याद फूगु जम्बो मिरिण्डा स्वंगः, आँटा ५ के जी वा छगू पाकेट व नेगू केजीया नेगू पाकेट जफत याडः धू याड बिल

अपलं पसलं ढः तालाजु नापतौल बिभागं स्वीकृति मकःगु, मूल्य सूची तयमःगु, प्वः चियगु सामानय् खाद्य विभागं अनुज्ञापत्र कायो जक मियमःगु, प्यानय् दर्ता याय् मःगु, सुचुकुखय् ध्यान तय मःगु खाँया निर्देशन ब्यूगु खाँ अनुगमन समितिं धःगु खः ।

अनुगमनय् खप नगरपालिका श्यानिटेशन उपशाखाया प्रमुख दिलिप कुमार सुवाल, व.नि रामकृष्ण प्रजापति, कर शाखाया अर्जुन खाइतु, महानगरीय प्रहरी परिसरया प्रहरी सहायक निरीक्षक रेशम बहादुर कार्की, राष्ट्रिय उपभोक्ता मञ्चया मनोज थापा, उद्योगवाणिज्य संघ खपया गौतम सुजखु, घरेलु तथा साना उद्योग संघया लक्ष्मी कवां, स्वास्थ्य कार्यालय खपया देवीका किजु, घरेलु तथा साना उद्योग कार्यालयया सिताराम त्वाय्ना पुं भःगु खः ।

अनुगमनय् खप नगरपालिका सहकारी संस्था अनुगमन समितिया कजि हरिप्रसाद बासुकला, दुजः पुं जितेन्द्र मुनंकःमि, श्याम सुन्दर मातां, हरि रत्न गोर्खाली, रञ्जना त्वाती व सहकारी अधिकृत रेभिड कुस्मां नं उपस्थित जूगु खः ।

अथेहे खप नगरपालिका सहकारी संस्था अनुगमन समितिया कजि हरि प्रसाद बासुकलाया न्ह्यलुवाय कमल विनायक मुलढोका, लान्चा फल्चा देगइना व च्याम्हासिंगल्य च्वंगु खुगू सहकारी संस्थाय् साउन २९ गते शुक्रबार अनुगमन यात ।

अनुगमनया इवल्य अपलं सहकारीत नगरपालिकाय् स्वीकृत मकः सँ चाय्कः च्वंगु कजि बासुकलाजुं धायो दिल । वयकलं प्रदेशं स्वीकृति ब्यूसां विनियमय च्वयो तःगु ज्या याय्ता प्रचलित कानुन काथं इज्जाजत कायमःगु वा सम्भौता याय् मःगु जूसा स्वापु दःगु निकाय पाखं इज्जाजत कायो वा सम्भौता याडः उकिया जानकारी विभाग वा कार्यालयता वियानिं जक संघ संस्थाया विनियमय च्वयो तःगु काथंया ज्या याय् फैगुलिं स्थानीय तहया स्वीकृति मदय्कः चाय्के मरुगु खाँ ब्याक दिल । वयकलं स्थानीय जनतापाखं उठय्यागु धेबा, घर जग्गा शेयरय् लगानी याइबल्य दुबय् जूसा जनताया धेबा दुवय् जुइग अल्य गुडबिल थें



बिस्यू वानिगु सम्भावना अपलं दैगु खाँ काडु दिल । वयकलं सरकारया सहकारी नीति नेखय् च्वामुगु (दोधारे) धायोदिसे नेद्वम्हा बराबर छगू सहकारी धायगु अलय् प्रदेशं बहुउद्देश्य सहकारी धमाधम दर्ता यागुली सहकारीखय् बेथिति वय् फःगु सम्भावना दःगुलिं नियमित याकय्ता अनुगमन याकागु खाँ काडु दिल । वयकलं नगरपालिकाया स्वीकृति मकः सैं न्ह्याकः तःगु सहकारी बिसे वासैं नगरपालिकां जिम्मेवारी काय मफैगु, मछिनिगुलिं नगरपालिकाया स्वीकृति मकसैं चाय्कतःगु सहकारी संस्थाय् धेबा ममुनय्ता नं अनुरोध याडुः दिल ।

अनुगमनया इवल्य् क्षितिज बहुउद्देशीय सहकारी संस्था लि. केन्द्रीय कार्यालय यैं पाखं छवपय् थाय् हिडकः छवप नगरपालिकाया स्वीकृति मकः सैं यैं, यल व छवप कार्यक्षेत्र स्वीकृति कायो बचत व ऋणया कालबिल जक यागुली छवप नगरपालिकाया अनुमति मदय्कः चाय्के मते जक अनुगमन समिति निर्देशन बिल । अनुगमन समितिया दुजः हरिरत्न गोर्खाली जुं बहुउद्देशीय सहकारीत स्वदाया दुनयँ वं अपलं कालबिल यागु प्रकृति व व्यवसायकाथं छगूजक ज्या याय दःगु सहकारी नियम दःगुलिं बचत व ऋण सहकारी संस्था दर्ता रोकय् यासां लिपा उकिंतुं हिल वैगु जुगुलिं सहकारी ऐनय् हे समस्या दः धायोदिल । अथेहे

खुड्यागूगु स्वप पौ. बःछि पौ(पाक्षिक)

सेवा कामना बहुउद्देशीय सहकारी संस्था नं नगरपालिकाकय् स्वीकृति मकः से. चाय्कः तःगु व दुजः नेसः, कर्मचारी खुम्हा व बजार सञ्चालक खुम्हा तयो चाय्कः तःगु खानय् दःगुलिं थौं निसैं हे कारोबार बन्द याडुः नगरपालिकाया स्वीकृत कायो जक चाय्केता निर्देशन बिल । अथेहे सुसन्देश बहुउद्देशीय सहकारी संस्था दोलखाया दिलबहादुर श्रेष्ठ नायो जुयो च्वंगु ठिमी थाय् हिडक छवप नगरपालिका वडा नं. ९ च्याम्हासिंगलय् चाय्केता कुतः याडुः च्वंगुली नगरपालिकाया स्वीकृति मकः सैं चाय्के मतेदक निर्देशन यात । अथेहे सुडाल वचत व ऋण सहकारी संस्था चांगु नगरपालिका बागेश्वरी दर्ता जगू सहकारी जिल्ला कार्य क्षेत्रया आधारय् च्याम्हासिंगलय् चाय्क तःगुलि नगरपालिकाया स्वीकृति मकसैं चाय्के मते अलय् थौं निसैं हे काल बिल याय मते जक निर्देशन यात । अथेहे भीगु समाज बहुउद्देशीय सहकारी संस्थाय् नं अनुगमन याडागु वडा निरीक्षक रामकृष्ण प्रजापति काडु दिल ।

सहकारी संस्था अनुगमन समितिया दुजः जितेन्द्र मुनकःमि, हरिरत्न गोर्खाली, श्याम मातां, रञ्जना त्वाती व भनपा सहकारी प्रमुख रेभिड कुस्मा व वडानिरीक्षक रामकृष्ण प्रजापति जुपुं सहभागी दःगु खः ।

वास पसलय् अनुगमन

साउन ३२

छवप नगरपालिका अनुगमन समितिया कजि राज कृष्ण गोराया न्हयलुवाय् ब्यासी निसैं कमल विनायक तक्या न्हयगू वास पसलय् सोमबार अनुगमन यात । अनुगमनया इवल्य् फार्मेसिष्ट वा औषधी व्यवस्था विभागं ओरिन्टेशन पास याडु अनुमति दःगु पसलं जक वास न्याय मिय दैगु खाँ काडु दिल ।

अनुगमनयँ आयान फार्मेसी स्वन्ह्या दिनयँ दर्ता याय्ता, प्यान व दर्ता याय्ता, औषधि व्यवस्था विभागया स्वीकृति मरुगु नपां फार्मेसिष्ट वा औषधी व्यवस्था विभागं ओरिन्टेशन पास अनुमति दःपिसं जक वासः मिय मःगुलि फार्मेसी अध्ययनरत संजिला थापा पाखं वास मियो च्वंगु लि वास ममियता निर्देश यात ।

हेलो जनस्वास्थ्य फर्मा नगरपालिकाय् दर्ता याडुः तःगु दर्ता प्रमाण-पत्र मक्यंगुलिं दर्ता मजुसा स्वन्ह्या दुनय दर्ता याय्ता व फार्मेसिष्ट वा औषधी व्यवस्था विभागं ओरिन्टेशन पास अनुमति कायो तः पिसं जक वास न्याय-मिय याय् मःगुलि फार्मेसी ब्वड च्वम्हा रोशन थापा, विजय लागेजू व अस्लम मन्सुरपाखं वास मियगु याडुः च्वंगु खानय् दःगुलिं वास ममियता निर्देशन बियो दिल सा म्याद फूगु वास डिकलोफेनाक, डाइथालामाइन-१ व क्षयरोग (जिर्ण ल्वय) या वास पसलय् मियमरुगुलिं आर-सिनेक्स ६०० गुगू पाकेट लुयो वगुलिं ममियता व स्वन्ह्या दुनयँ कार्यालय वयता निर्देशन यात ।

विनायक फर्मासं फार्मेसिष्ट व औषधी व्यवस्था विभागं ओरिन्टेशन पास अनुमति दःपिसं जक वास मियमःगुलि फार्मेसी ब्वडः च्वम्हा प्रमिला तुल्लिवाख्यो व रोजी बासुकलापिसं वास मियगु याडु च्वंगुलिं वास ममियता व म्याद फूगु वासत पोटक्लोर डागू बटा, जी कोरेल स्वंगू बटा, सनस्क्रिन लोशन छगू बटा, सिनोहिस्त प्यंगू बटा, ब्याकफेन-२५- छगू बटा, इ-एम क्लेभ ६२५ हिगू पाकेट, ट्रिजोल क्रिम स्वंगू बटा, सिनारेस्ट छगू बटा, कार माइसाइड खुगु बटा, सेफवार स्वंगू बटा, फर मिड्ग जि वान नेगु पाकेट मिकोली स्वंगू बटा, मेटोक्लोडामाइड हाइड्रोक्लोरिक हिछगू बटा, आसमारेक्स स्वंगू बटा, आक्लोभ गूगु बटा, सिटाड्रप्स नेगु बटा, सिफम-१०० हिगू बटा, डाबरया स्यानिटाएजर प्यंगः, फ्लुपोन न्हयगू बटा स्टेरिम्याक्स स्यानिटाइजर खुगूबटा, ए एमक्लोन हिगू पाकेट जफत याडुः धू यात । नपां स्वन्ह्या दुनयँ नगरपालिकाय् मवसिं मज्यू धायो कडा निर्देशन यागु खाँ वडा निरीक्षक रामकृष्ण प्रजापति धायो द्यूगु खः ।

खोपो फार्मेसी एण्ड क्लिनिक व कमलविनायक फर्मा नविकरण याय् मःगु व च्वयया तल्लाय तयमःगु निर्देशन बिल । भीगु वास पसः फार्मेसी व्यवस्थित काथं चाय्कः तःगु खानय् दः ।

सूर्य कोल्ड स्टोरय् म्याद फूगु सामानत हाप लिटरया ड्यू गुगः, कोक हिगः, फाण्टा स्वंगः जफत याडुः नष्ट यात ।

अथेहे छवप नगरपालिका अनुगमन समितिया कजि राजकृष्ण



खुड्यागुगु स्वप पौ. बःछि पौ(पाक्षिक)

बिचः हाय्काः

भाजु पुर्ण बहादुर वैद्य



भाजु पुर्ण बहादुर वैद्य ने.सं. १०६० गुलाँगा गुपुन्हिखुनुं ख्वपया चोछै त्वाल्य जन्म जूगु खः । पाटन संयुक्त क्याम्पसय् नेपाल भाषा ब्वंकदीम्हा वयक नां दांम्हा नेपाल भाषाया आधुनिक कवि खः । वयकया 'सरासु' चिनाखँ मुना, 'कविताया लागा' च्वसु मुना, 'जि छगू अभिव्यक्ति' च्वखँ मुना, लःलःखः चिनाखँ मुना पिथाड तःगु

दः । वयकया छपू छपू चिनाखँ ज्वः मरुगु काथं कायो तःगु दःसा च्वखँ मुना सफू श्रेष्ठ सिरपां सम्मान यागु दः ।

नेपाल भाषा साहित्य तः मुंज्याया दबुली दायँ दायँ पतिकं स्यल्लागु चिनाखँ, ग्यसुलागु न्वचु तयो जनता ग्वाकय्गु ज्या साड द्यम्हा न्हँ कविताया न्ह्यलुवा भाजु पूर्णबहादुर वैद्य जु ने.सं ११४१ गुलाँगा पञ्चमी खुनुं मरुगुलिं श्रद्धाञ्जली दे छासे सकल छँ जः पिन्ता बिचः हाय्कः च्वडा ।

वयकया छपु चिनाखँ

लः मात्र लः खः

छिला छिये ज्यु, लः यात

छंके दुगु रंगं, छंगु थलय्

ह्याउँक, ... वाउँक ... या म्हासुक

उकी गाढा ... फिक्काया, गुगु स्थिति वड

व छंगु रंगया छ्यासा व संस्कारया, मात्रा खः

लखय् रंग न्ह्यागु थजुइब्बू

व लःया हे रंग मखु

धात्थें ला, व थलया रंग खः

वया छचाःलि हानावःगु

या वयाके लानाचवंगु छताजि धू खः

वदुने क्वातुक्क न्यनाचवंगु

गुगु वया स्थिति व संस्कारया ग्यसु खः

तर न्ह्यागु रंगदुने नं, लः गुगु दु,

व ला छताहे खः

अनं लः या गुगुं जात व रंग मदु

गुबलय् जः या क्वाःगु तापं

व थः थम्हं चरम चेतनाय्, थाहां वनी

छंगु रंग वं, छंगु थलय्सं त्वःता थकी

अन्ततः, न्ह्याय्या न्ह्यागुहे लः थजु

लः - मात्र लः खः, व गुगुं रंग मखु ।

गोराया न्ह्यलुवाय् दूधपाटीया गूगु वास पसलय् आइतबार यागु अनुगमनया इवल्य् वास पसलय् वासमियता च्वडः च्वंपुं मनूत औषधि व्यवस्था विभागं स्वीकृत कायो तःपुं मच्चंसें मेपुं च्वडः च्वंगु नपां फार्मेशिष्ट वा औषधी व्यवस्था विभागं ओरिन्टेशन पास यापुं जुयमगुली अथय् मजगु कजि गोरा जुं धायोदिल ।

अनुगमनया इवल्य् मित्र हेल्थ केयर सेन्टर २०७६ साल निसें नगरपालिकाय् दर्ता मयासैं पसः चल्य् याडः च्वंगुलिं स्वन्ह्या दुनयँ दर्ता याय्ता निर्देशन बिलसा, म्याद फूगु आक्वाभैन बोटलया नाः नेगू कार्टुन व गूगुः जफत याडः धू याडः बिल । नपां पसलय् वास मिडम्हा रिया भूजु फार्मेशिष्ट ब्वडः च्वम्हा अलय् अनुमति प्रमाणपत्र मरुगुलिं फार्मेशिष्ट वा औषधी व्यवस्था विभागं ओरिन्टेशन पास यापिसं जक वास मिडकेता निर्देशन यात ।

अथेहे बाराही फार्मसी पसः नवीकरण याय्ता व म्याद फूगु जानकारी वियगु कम्प्यूटर प्रणालीया व्यवस्था याय् मःगु सुभाब बिल ।

अथेहे समृद्धि फार्मसी सं फार्मेशिष्ट वा औषधी व्यवस्था विभागं ओरिन्टेशन पास यापिसं जक वास मिय दैःगुली पसलय् च्वनि पिनिगु प्रमाणपत्र पसलय् तय्ता व बिल खय् कालबिल याय्ता निर्देशन यात ।

अथेहे डोलेश्वर फार्मसी नवीकरण याय्ता, वासमिय बलय् बिल वियमःगु, पसलय् च्वनिम्हा औषधी व्यवस्थाया अनुमति प्रमाण पत्र दःम्हा जुयमः धायोदिसे म्याद फूगु वास लिगलफाज- ५- छगू पाकेट व सेफोट छगः जफत याडः धू यात । अलय् म्याद फूगु वास क्यनिगु कम्प्यूटर प्रणालीया व्यवस्था याय् मःगु निर्देशन बिल ।

अथेहे रोज डेण्टल केयर प्रा.लि. २०६८ साल निसें ख्वप नगरपालिकाय् दर्ता मयासैं चाय्कः च्वंगुली स्वन्ह्या दुनय् दर्ता याय्ता दिर्देशन यात ।

अथेहे अल्फा मेडिकल हल नवीकरण याय्ता वास मिडबलय् बिल बियता अलय् पसलय् च्वनिम्हा औषधी व्यवस्था विभागया अनुमति प्रमाणपत्र दः म्हा जुयमःगु, म्यादफूगु वासया जानकारी वियगु कम्प्यूटर प्रणाली व्यवस्था याय् मःगु सुभाब नं बिल ।

अथेहे प्राइम डेण्टल क्लिनिकं दांकः सेवा बियता व सुचुकुचु खय् ध्यान बियता अलय् न्यातपोल फार्मसी व दीप फर्मा नवीकरण याय्ता निर्देशन बिल ।

अनुगमनय् अनुगमन समितिया दुजः हरिराम सुवाल, रोशन मैया सुवाल, ख्वप नगरपालिकाया श्यानिटेशनया न.नि. दिलिप कुमार सुवाल व ननि. रामकृष्ण प्रजापति, कर शाखाया मोहन देवी ब्याञ्जु, महानगरीय प्रहरी परिसरया प्र.स.नि बलराम स्यामाजु, निरञ्जन थापा उद्योग वाणिज्य संघया गौतम सुजखु, विश्वराम दुवाल, राष्ट्रिय उपभोक्ता मञ्चया मनोज थापा, निरञ्जन थापा घरेलु तथा साना उद्योग संघया लक्ष्मीप्रसाद कवां, भक्तपुर घरेलु तथा साना उद्योग कार्यालयया सीताराम त्वायना व जिल्ला स्वास्थ्य कार्यालय भक्तपुर व औषधी व्यवस्था विभाग पाखं नं सहभागी दःगु खः ।

११, १२ तर्गिंया छात्रवृत्तिया विषय प्राचार्यपुं नपां बैठक
(२०७८ भाद्र १० गते)



सापारु मःकाथं जक डाय्केता स्वापु दःपुं नपां बैठक
(२०७८ भाद्र २ गते)



**अन्तर्राष्ट्रिय युवा दिवसया लसताय् जुगु ज्या इवःसं माननीय
सांसद प्रेम सुवाल (२०७८ भाद्र ४ गते)**



**अन्तर्राष्ट्रिय युवा दिवसया लसताय् जुगु ज्या इवःसं माननीय
प्रदेश सांसद सुरेन्द्र राज गोसाइँ (२०७८ भाद्र ४ गते)**

